

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI KHAMIS : 7 NOVEMBER 2019

SOALAN NO: 1

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA , PENGKAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 7 NOVEMBER 2019 (KHAMIS)

SOALAN NO. 1

Minta **MENTERI AIR, TANAH DAN SUMBER ASLI** menyatakan keadaan dengan cadangan pindaan Kanun Tanah Negara 1965 (Akta 56) Skim Daftaran Pajak Swasta di mana pembeli rumah tiada pemilikan hartanah tapi hanya menjadi penyewa pajak tempoh panjang.

SOALAN NO: 1

JAWAPAN

Tuan yang di- Pertua,

Kanun Tanah Negara telah diperkenalkan hasil daripada amalan semasa di Tanah Melayu dan penyeragaman undang-undang tanah sedia ada. Seksyen 76 Kanun Tanah Negara menyatakan pemilikan tanah hanya dikeluarkan melalui pemberimilikan kekal selama-lamanya ataupun pajakan bertempoh. Keputusan untuk memberi pajakan bertempoh hanya diluluskan oleh Pihak Berkuasa Negeri sahaja tidak melebihi 99 tahun.

Adalah dimaklumkan bahawa, setelah dibuat perundingan di antara pihak Kerajaan Persekutuan dengan pihak Kerajaan Negeri melalui Mesyuarat Pengarah Tanah Malaysia Bilangan 2/2018 yang telah diadakan pada 23 Oktober 2018, telah diputuskan bahawa cadangan *Private Lease Scheme* tidak diteruskan memandangkan pengeluaran hakmilik adalah kuasa eksklusif Kerajaan Negeri.

Sekian, terima kasih.

JAWAPAN BAGI PERTANYAAN LISAN
MESYUARAT KETIGA, PENGGAL KEDUA,
PARLIMEN KE-14 DEWAN RAKYAT

PERTANYAAN : LISAN

DARIPADA : DATO' SRI AZALINA OTHMAN SAID
[Pengerang]

TARIKH : 7 NOVEMBER 2019 (KHAMIS)

SOALAN : 2

DATO' SRI AZALINA OTHMAN SAID [Pengerang] minta **PERDANA MENTERI** menyatakan apakah status penggubalan Rang Undang-Undang berhubung dengan "*Freedom of Information*" yang akan menggantikan Akta Rahsia Rasmi 1972 [*Akta 88*] serta bilakah Kerajaan bercadang untuk membuat konsultasi awam berkenaan Rang Undang-Undang tersebut sebelum dibawa ke Parlimen.

JAWAPAN: YB TUAN MOHAMED HANIPA MAIDIN, TIMBALAN
MENTERI DI JABATAN PERDANA MENTERI

Tuan Yang di-Pertua,

Kerajaan pada 11 Julai 2018 telah memutuskan supaya satu Akta Kebebasan Maklumat digubal di peringkat Persekutuan. Pelaksanaan cadangan ini diletakkan di bawah bidang kuasa Menteri di Jabatan Perdana Menteri yang bertanggungjawab mengenai hal ehwal undang-undang dan turut dibantu oleh Kementerian Komunikasi dan Multimedia Malaysia (KKMM) dalam urusan penggubalan akta tersebut.

Dalam konteks ini, beberapa sesi perbincangan telah diadakan melibatkan Kementerian/Jabatan/Agensi seperti Pejabat Ketua Pegawai Keselamatan Kerajaan dan Kementerian Komunikasi dan Multimedia Malaysia, Pejabat Penasihat Undang-Undang Negeri Pulau Pinang, Pejabat Penasihat Undang-Undang Selangor dan Unit Pemodenan

NO. SOALAN : 2

Tadbiran dan Perancangan Pengurusan Malaysia (MAMPU) bagi membincangkan hala tuju dan konsep berkaitan undang-undang kebebasan maklumat selain meneliti keperluan sama ada:

- (i) untuk memansuhkan Akta Rahsia Rasmi 1972 [Akta 88];
- (ii) mewujudkan Akta Kebebasan Maklumat dan mengekalkan Akta 88; atau
- (iii) menambahbaik peruntukan di dalam Akta 88 sahaja.

Kerajaan juga komited untuk memastikan cadangan gubalan Akta Kebebasan Maklumat ini dilaksanakan secara holistik dan inklusif. Justeru, konsultasi awam berkaitan cadangan gubalan Akta Kebebasan Maklumat akan dilaksanakan sebaik sahaja aspek polisi berkaitan akta ini dimuktamadkan dengan pihak berkepentingan.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 7 NOVEMBER 2019 (KHAMIS)

SOALAN

Minta **MENTERI PENGANGKUTAN** menyatakan usaha Kerajaan untuk menyediakan perkhidmatan tambang pelajar atau "student fare" kepada penuntut universiti dari Sabah dan Sarawak bagi mengurangkan beban keluarga mereka terutama pada musim perayaan serta sama ada lebih banyak penerbangan harga tetap bagi laluan Kuala Lumpur - Sibu / Johor - Sibu dapat disediakan pada musim perayaan yang akan datang.

JAWAPAN

Yang di-Pertua,

1. Untuk makluman Yang Berhormat, Kerajaan sentiasa menggalakkan syarikat-syarikat penerbangan negara untuk menawarkan perkhidmatan tambang pelajar ataupun "*student fare*" kepada semua penuntut universiti termasuk dari Sabah dan Sarawak bagi tujuan mengurangkan beban terhadap keluarga mereka khususnya semasa musim perayaan.
2. Dalam hubungan ini, Syarikat AirAsia Berhad dan Malindo memaklumkan bahawa mereka akan meneliti dan mempertimbangkan cadangan ini.
3. Manakala, syarikat Malaysia Airlines Berhad (MAB) telah memperkenalkan portal web MHexplorer pada Oktober tahun lalu yang mensasarkan para pelajar universiti berumur di antara 18 hingga 26 tahun untuk menggunakan perkhidmatan penerbangan MAB. Antara

keistimewaan yang ditawarkan ialah pengurangan tambang penerbangan sehingga 20% daripada tambang penerbangan biasa. Di samping itu juga, MHexplorer turut menawarkan lain-lain keistimewaan seperti elaun bagasi tambahan 10 kilogram, perubahan tarikh penerbangan percuma, mata ganjaran Enrich (*Enrich Points*) untuk program pelajar, diskaun khas untuk hotel terpilih dan tambang teksi melalui ejen-ejen yang dilantik oleh pihak MAB.

4. Selain itu, mulai 31 Julai 2019 lalu, program MHexplorer telah diperluaskan lagi kepada para pelajar berusia antara 13 hingga 26 tahun, termasuk para guru dan ahli akademik yang berusia sehingga usia 60 tahun yang masih aktif bekerja di sekolah-sekolah dan institut pendidikan tinggi.

5. Bagi maksud cadangan supaya lebih banyak penerbangan harga tetap yang lebih rendah disediakan pada musim perayaan akan datang bagi laluan-laluan penerbangan terpilih, termasuk Kuala Lumpur-Sibu dan Johor Bahru-Sibu, pihak Kerajaan dalam mesyuarat dengan syarikat-syarikat penerbangan pada 4 September 2018 antara lainnya telah memutuskan supaya Kerajaan tidak akan menetapkan harga siling dan harga lantai bagi tambang tiket penerbangan domestik bagi tujuan mengelakkan sebarang manipulasi oleh syarikat-syarikat penerbangan yang mana purata harga tiket akan menjadi lebih tinggi walaupun di luar musim perayaan sekiranya ia dilaksanakan.

6. Walau bagaimanapun, bagi mengurangkan kenaikan harga tambang sempena musim perayaan, Kerajaan telah mendapatkan komitmen daripada syarikat-syarikat penerbangan negara untuk meningkatkan kapasiti penerbangan melebihi 20% bagi tempoh tujuh (7) hari sebelum musim perayaan Tahun Baru Cina, Hari Raya Aidilfitri, Hari Gawai dan Pesta Keamatan khususnya di laluan-laluan yang mempunyai permintaan yang tinggi termasuk bagi laluan Semenanjung ke Sibu.

7. Pengumuman mengenai penerbangan tambahan dan tawaran harga akan diumumkan oleh syarikat-syarikat penerbangan yang berkaitan dalam masa terdekat. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK ALEXANDER NANTA LINGGI [KAPIT]

TARIKH : 7 NOVEMBER 2019

SOALAN

DATUK ALEXANDER NANTA LINGGI [KAPIT] minta **PERDANA MENTERI** menyatakan apakah benar atau tidak Kerajaan Persekutuan ingin mengurangkan bilangan penjawat awam di seluruh negara.

JAWAPAN : YB TUAN MOHAMED HANIPA BIN MAIDIN, TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, jumlah keseluruhan perjawatan perkhidmatan awam pada masa kini adalah sebanyak 1.71 juta dengan pengisian sebanyak 1.57 juta (91.5%) yang merangkumi perkhidmatan awam persekutuan, badan berkanun persekutuan, perkhidmatan awam negeri, badan berkanun negeri dan pihak berkuasa tempatan. Kerajaan berpandangan jumlah perjawatan ini boleh dikurangkan tanpa menjejaskan prestasi penyampaian perkhidmatan supaya selaras dengan sasaran yang ditetapkan di dalam RMKe 11 iaitu mencapai saiz perkhidmatan awam kepada penduduk dengan nisbah 1:20 berbanding 1:19 pada masa sekarang.

Sehubungan itu, Kerajaan dalam proses untuk menstrukturkan semula jumlah perjawatan dalam perkhidmatan awam berdasarkan kedudukan ekonomi negara dan perkembangan teknologi semasa melalui pelbagai kaedah/mekanisme dan langkah antaranya kajian pertindihan fungsi antara jabatan/agensi, rasionalisasi perjawatan, pengoptimuman sumber manusia, serah urus fungsi (*outsourcing*), penyampaian perkhidmatan alternatif (*Alternative Service Delivery*), penswastaan, penggunaan teknologi dan pengisian jawatan secara berhemah mengikut keperluan.

Perjawatan yang dikenal pasti untuk dimansuhkan adalah termasuk jawatan kosong yang tidak diperlukan, jawatan di agensi yang mempunyai pertindihan fungsi dan jawatan bagi perkhidmatan yang boleh diautomasi, diserah urus fungsi (*outsourcing*) serta yang boleh digantikan perkhidmatan alternatif. Sehubungan itu, Kerajaan menjangkakan ianya tidak akan memberi kesan kepada tugas-tugas sedia ada memandangkan jawatan yang dimansuhkan ini merupakan jawatan yang tidak diperlukan dan tidak melibatkan penyandang sedia ada. Tiada pengurangan kakitangan awam sedia ada dalam pelaksanaan dasar ini. Bagi maksud ini, Kerajaan telah menubuhkan Jawatankuasa Cadangan Rasionalisasi Jabatan/Agensi yang diterajui oleh Kementerian Kewangan Malaysia dan Jabatan Perkhidmatan Awam bagi mengenal pasti pertindihan fungsi antara jabatan/agensi dan mencadangkan jabatan/agensi tersebut dirasionalisasikan termasuk penswastaan.

Kerajaan juga berhasrat untuk mewujudkan lebih banyak peluang pekerjaan di sektor swasta dengan gaji yang lebih lumayan bagi mengurangkan pergantungan rakyat terhadap pekerjaan di sektor awam. Sehubungan itu, melalui konsep penswastaan, fungsi-fungsi tertentu yang dilaksanakan oleh jabatan/agensi kerajaan yang boleh menjana hasil secara konsisten dan berdaya maju adalah berpotensi untuk diswastakan.

NO SOALAN : 4

Melalui penswastaan, keupayaan dan kemampuan untuk menjana pendapatan sendiri dapat dipertingkatkan serta mengurangkan pembiayaan kerajaan terhadap perbelanjaan operasi jabatan/agensi berkenaan. Dengan perkembangan teknologi terkini, Kerajaan percaya perkhidmatan awam akan lebih produktif apabila pembaziran dihapuskan, pengagihan sumber dilaksanakan dengan cekap dan guna tenaga diganti dengan penggunaan teknologi maklumat serta komputer.

Sektor awam sewajarnya hanya memfokuskan kepada penyediaan dasar utama, menentukan arah dan penyediaan perkhidmatan serta tidak terbabit secara aktif dalam aktiviti ekonomi perdagangan di Malaysia.

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG [TANJUNG MALIM]

TARIKH : 7 NOVEMBER 2019 (KHAMIS)

SOALAN

Tuan Chang Lih Kang [Tanjung Malim] minta PERDANA MENTERI menyatakan bantuan dan pelan pembangunan yang telah atau bakal dilaksanakan di kampung-kampung Orang Asli di kawasan Parlimen Tanjung Malim dari tahun Mei 2018 hingga kini.

JAWAPAN : YB SENATOR TUAN WAYTHA MOORTHY A/L PONNUSAMY, MENTERI DI JABATAN PERDANA MENTERI

Tuan Yang di-Pertua,

Untuk makluman, terdapat 41 buah kampung Orang Asli dengan penduduk berjumlah 20,637 orang di parlimen Tanjung Malim. Sehingga kini, daripada 41 buah kampung, sebanyak 27 buah kampung telah mempunyai bekalan air terawat, 28 kampung telah mempunyai bekalan elektrik dan semua kampung telah mempunyai jalan perhubungan.

Sejak Mei 2018 sehingga kini, pelbagai program pembangunan dilaksanakan oleh JAKOA di Parlimen Tanjung Malim iaitu pelaksanaan projek infrastruktur, bantuan rumah bina baru, bantuan baik pulih rumah dan bantuan pembangunan ekonomi berjumlah **RM1,023,099.70.**

NO. SOALAN : 5

JAKOA sentiasa membuat perancangan berdasarkan peruntukan yang diagihkan dan mengambil perhatian terhadap isu pembangunan yang melibatkan masyarakat Orang Asli bagi memastikan Orang Asli tidak tercicir dari arus perdana dan peruntukan dibelanjakan secara optima. JAKOA akan meneruskan pelan pembangunan yang telah dirancang berdasarkan Pelan Strategik JAKOA 2016-2020 kepada seluruh masyarakat Orang Asli di kampung-kampung Orang Asli amnya termasuk masyarakat Orang Asli di kawasan Parlimen Tanjung Malim.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB [TANJONG
MANIS]**

TARIKH : 7 NOVEMBER 2019 (KHAMIS)

SOALAN NO. 6

Minta **MENTERI AIR, TANAH DAN SUMBER ASLI** menyatakan adakah peruntukan untuk membaiki hakisan pantai dan pembinaan ban di Kampung Sebako yang kini teruk terjejas akibat kemasukan air masin dan merosakkan tanah kebun warga kampung.

JAWAPAN

Tuan Yang di-Pertua,

1. Kerajaan sememangnya memandang serius masalah hakisan pantai yang berlaku di seluruh Malaysia. Oleh yang demikian, masalah ini perlu ditangani secara berperingkat memandangkan kos bagi melaksanakan kaedah mengawal hakisan pantai seperti pembinaan *groyne*, penambakan pasir, pembinaan benteng batu mahupun membina pemecah ombak bagi mencegah hakisan pantai adalah sangat tinggi.
2. Dalam hal ini, Kerajaan terpaksa menumpukan kerja-kerja membina benteng baharu berbanding memperbaiki benteng yang telah rosak atau lain-lain kaedah bagi mencegah hakisan pantai **mengikut tahap kritikal hakisan pantai tersebut** dan mengikut tahap kesediaan peruntukan yang telah diluluskan.
3. Peruntukan baharu bagi program **mengatasi fenomena air pasang besar dan hakisan pantai di Negeri Sarawak** telah dipohon sebanyak RM 350 juta dalam RP4 2019 RMKe-11, yang merangkumi hakisan pantai di kawasan yang dilaporkan, namun tidak diluluskan. Walaubagaimanapun, peruntukan ini akan dipohon semula dalam RMK-12 akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 7 NOVEMBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan apakah langkah-langkah Kementerian dalam memastikan setiap rakyat Malaysia dapat mengecapi kemakmuran bersama / *shared-prosperity* seiring dengan dasar yang telah diperkatakan, dan bagaimana kemakmuran bersama ini dapat diterjemahkan dalam kehidupan bernegara kepada semua bangsa.

JAWAPAN

Tuan Yang di-Pertua,

1. Wawasan Kemakmuran Bersama 2030 (WKB) merupakan satu agenda nasional yang memandu hala tuju negara secara lebih holistik mulai tahun 2021 hingga 2030. Matlamat WKB adalah untuk menyediakan taraf hidup wajar atau dengan izin *decent standard of living* kepada semua rakyat Malaysia pada tahun 2030.
2. Secara keseluruhannya, walaupun pertumbuhan ekonomi negara menunjukkan prestasi yang menggalakkan, namun ianya masih belum digembleng sepenuhnya bagi mencapai potensi yang optimum. Selain itu, terdapat pelbagai isu struktur yang perlu ditangani dalam usaha untuk melonjakkan ekonomi negara ke peringkat yang lebih tinggi.
3. Oleh yang demikian, objektif pertama WKB adalah untuk menstruktur semula ekonomi ke arah yang lebih progresif, berpaksikan ilmu dan bernilai tinggi. Penekanan akan diberikan kepada peningkatan produktiviti sebagai salah satu pemacu pertumbuhan ekonomi. Usaha juga akan dilaksanakan bagi menggalakkan industri untuk mempergiat aktiviti pertumbuhan ekonomi masa hadapan yang bernilai tinggi. Selain memperkukuhkan sektor pertumbuhan ekonomi sedia ada, Kerajaan akan terus meningkatkan inisiatif pendigitalan dan penerimgunaan teknologi secara lebih meluas terutamanya dalam kalangan Perusahaan Kecil dan Sederhana (PKS).
4. Selain daripada isu struktur, masih wujud jurang ekonomi yang ketara di setiap peringkat kumpulan pendapatan, wilayah, etnik, dan rangkaian bekalan. Objektif kedua WKB akan menumpukan kepada usaha untuk merapatkan jurang tersebut. Jurang pendapatan yang ketara di antara kelas pendapatan berlaku berikutan pendapatan kumpulan isi rumah B40 lebih bergantung kepada penggajian dan kumpulan ini juga kurang memiliki aset yang boleh menjana pendapatan lain. Kerajaan yakin tumpuan kepada aktiviti ekonomi bernilai tinggi dan pewujudan pekerjaan berpendapatan tinggi akan menyumbang kepada usaha untuk merapatkan jurang ekonomi antara kumpulan pendapatan.

5. Di samping itu, Teras Strategik 5 WKB, Kesejahteraan Sosial, memberi penekanan kepada kebajikan semua kelompok masyarakat terutamanya golongan rentan ekonomi dan kumpulan isi rumah B40.
6. Dalam konteks jurang pembangunan antara wilayah, khususnya kawasan bandar dan luar bandar, Kerajaan sedar bahawa jurang pengagihan ekonomi antara kedua-dua kawasan semakin melebar. Dalam Teras Strategik Kedua, terdapat 15 cadangan Aktiviti Pertumbuhan Ekonomi Utama (KEGA). Antaranya ialah tumpuan kepada Pertanian Pintar yang akan meningkatkan produktiviti hasil tanaman terutamanya untuk agropreneur di luar bandar.
7. Selain itu, penekanan kepada Komoditi Malaysia 2.0 membolehkan tumpuan diberikan kepada penghasilan produk hiliran daripada komoditi, seperti sawit dan getah, supaya dapat menjana nilai ditambah dan pulangan yang lebih tinggi. Dalam Teras Strategik keenam WKB pula, iaitu Keterangkuman Wilayah, pemetaan titik tumpuan ekonomi, dengan izin, *economic hot spots*, akan dilaksanakan. Usaha ini bagi mengenal pasti kawasan luar bandar yang berpotensi sebagai pusat aktiviti ekonomi yang mampan. Malaysia akan memanfaatkan peluang daripada perkembangan peralihan ekonomi dunia dari Eropah ke Asia dengan menjadikan negara sebagai Hub Ekonomi ASEAN.
8. Bagi mengembleng pelbagai usaha di bawah WKB, dasar, strategi dan inisiatif khusus akan diterjemahkan dalam Rancangan Malaysia Kedua Belas (RMKe-12) dan Rancangan Malaysia Ketiga Belas (RMKe-13).
9. Kerajaan yakin dengan pertumbuhan ekonomi yang progresif dan mampan serta pengagihan ekonomi yang adil, saksama dan inklusif pada semua peringkat; rakyat akan dapat hidup bersatu padu dengan meraikan kepelbagaian bangsa dan budaya sebagai asas penyatuan negara.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 7 NOVEMBER 2019

SOALAN

TUAN AHMAD TARMIZI BIN SULAIMAN [SIK] minta **MENTERI INDUSTRI UTAMA** menyatakan langkah ke hadapan untuk memastikan program IPG (Intensif Pengeluaran Getah) kepada penoreh getah dapat dilaksanakan dengan lebih berkesan khususnya insentif yang diberikan juga dimanfaatkan oleh penoreh getah yang tidak mempunyai kebun dan hanya mengambil upah menoreh di kebun milik orang lain.

JAWAPAN

Tuan Yang Di-Pertua,

Kerajaan amat prihatin terhadap masalah yang dihadapi oleh pekebun kecil terutamanya di luar bandar dalam membuat tuntutan Insentif Pengeluaran Getah (IPG). Untuk makluman, penoreh getah yang menjalankan aktiviti penorehan di kebun milik orang lain, IPG masih boleh dinikmati melalui kebenaran dari pemilik kebun menerusi pemilihan nisbah tuntutan IPG yang telah ditetapkan. Antara langkah yang diambil untuk memastikan IPG dilaksanakan dengan berkesan;

- (a) Mendapatkan kerjasama dan bantuan dari pelesen (peraih getah) dan ketua kampung untuk mengumpul dan menghantar borang tuntutan IPG pekebun kecil ke pejabat LGM berdekatan. Oleh itu, pekebun kecil

SOALAN NO : 8

boleh mengemukakan borang tuntutan kepada pelesen atau ketua kampung masing-masing;

- (b) Pegawai LGM juga turut turun padang ke lokasi tumpuan seperti yang dicadangkan oleh ketua kampung bagi mengutip borang tuntutan IPG daripada pekebun kecil. Di antara lokasi tumpuan adalah balai Jawatankuasa Kemajuan dan Keselamatan Kampung (JKKK), masjid atau surau, Pejabat Daerah dan Pejabat RISDA yang berdekatan. Oleh itu, pekebun kecil boleh menghantar borang ke lokasi tersebut pada tarikh dan masa yang ditetapkan; dan
- (c) Mewujudkan kerjasama koordinasi IPG antara RISDA dan LGM di mana RISDA berperanan sebagai pemudahcara dalam membantu mengumpul borang tuntutan IPG daripada pekebun kecil sebelum diserahkan kepada pihak LGM.

Oleh demikian, pendekatan ini dapat memudahkan proses tuntutan IPG di kalangan pekebun kecil sekali gus memastikan pekebun kecil dapat menikmati insentif yang telah diperkenal oleh pihak Kerajaan bagi mengurangkan beban yang ditanggung oleh pekebun kecil semasa harga getah rendah.

Sekian terima kasih.

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN WILLIE ANAK MONGIN
[PUNCAK BORNEO]**

TARIKH : 7 NOVEMBER 2019

SOALAN NO. 9

Minta **PERDANA MENTERI** menyatakan perkembangan terkini dalam perangkaan Pelan Pembangunan Masyarakat Orang Asli Nasional yang bertujuan menangani isu utama yang dihadapi masyarakat Orang Asli di negara ini.

**JAWAPAN : YB SENATOR TUAN WAYTHA MOORTHY A/L
PONNUSAMY, MENTERI DI JABATAN PERDANA MENTERI**

Tuan Yang di-Pertua,

Konvensyen Orang Asli Kebangsaan (KOAK) yang diadakan pada April 2019, telah menghasilkan 137 resolusi. Resolusi ini adalah merupakan isu dan cabaran yang dihadapi oleh masyarakat Orang Asli. Resolusi ini telah mengemukakan tujuh (7) fokus utama dalam menangani dan menentukan hala tuju atau rancangan masa depan bagi masyarakat Orang Asli.

Pelan jangka panjang ini menjurus kepada matlamat utama iaitu mengatasi kemiskinan tegar dan mengarusperdanakan masyarakat Orang Asli seiring dengan pembangunan pesat Malaysia melalui tujuh (7) fokus utama yang melibatkan perkara berkaitan tanah, pendidikan, kesihatan, ekonomi, kepimpinan, infrastruktur dan kebudayaan. Ianya adalah merupakan dasar pembangunan masyarakat Orang Asli sehingga 2030. Penzahiran dasar ini akan melibatkan pelan tindakan

NO. SOALAN : 9

atau Pelan Strategik JAKOA melalui peruntukan dua (2) Rancangan Malaysia bagi tujuan pelaksanaannya iaitu Rancangan Malaysia Ke-12 dan ke-13.

Pembentukan draf dasar pembangunan masyarakat Orang Asli ini sedang melalui proses libat urus seterusnya bersama pemegang-pemegang taruh yang berkaitan bagi memastikan Pelan Pembangunan Nasional Orang Asli ini kelak selaras dengan prinsip Izin, Maklum, Awal, Bebas dan Telus (IMABT) atau FPIC. Keperluan mematuhi prinsip ini adalah selaras dengan *United Nations Declaration on the Rights of Indigenous Peoples (UNDRIP)* (dengan izin).

Setelah draf pelan ini dibangunkan sesi konsultasi dirancang untuk diadakan pada tahun hadapan dengan menyasarkan penglibatan maksimum pemegang-pemegang taruh yang berkepentingan. Kerajaan yakin dengan usaha dan percambahan idea dan fikiran dari semua pihak yang terlibat mampu menghasilkan satu rangka dasar pembangunan masyarakat orang asli yang komprehensif dan holistik.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB DATIN MASTURA BINTI MOHD YAZID
[KUALA KANGSAR]

TARIKH : 07 NOVEMBER 2019

SOALAN

Minta **MENTERI SUMBER MANUSIA** menyatakan apakah peranan utama yang dimainkan oleh ikon TVET Kementerian Yusry Abdul Halim (Yusry KRU) dalam aspek pembangunan TVET, dan bagaimanakah kemahiran dan pengalaman yang ada pada beliau dalam bidang seni dapat memartabatkan Pendidikan Teknikal dan Latihan Vokasional negara.

JAWAPAN

Tuan Yang di-Pertua,

1. Pendidikan dan Latihan Teknikal dan Vokasional (TVET) mempunyai peranan penting dalam membantu usaha kerajaan untuk menjadi negara maju yang setaraf dengan negara maju lain dan tidak keterlaluan jika TVET dianggap sebagai kunci kemajuan negara pada masa akan datang.
2. Kementerian telah melantik saudara Yusry Abdul Halim atau lebih dikenali sebagai Yusry KRU sebagai IKON TVET KSM, dan perkara ini telah diumumkan oleh Yang Berhormat Menteri Sumber Manusia dalam Sidang Media Pra-Pelancaran Persidangan TVET 2019 dan Pengumuman Ikon TVET pada 4 Julai 2019. Lantikan untuk tempoh dua tahun dan akan turut bekerjasama dengan pasukan Penasihat TVET KSM dan juga jabatan.
3. Lantikan beliau bukanlah berdasarkan kepada populariti semata-mata, tetapi diperkukuhkan lagi dengan pencapaian beliau dalam pelbagai cabang seni baik di dalam mahupun luar negara. Beliau telah menunjukkan pencapaian cemerlang dalam industri animasi dan kesan khas visual yang merupakan salah satu bidang TVET yang ditawarkan di negara ini. Bidang TVET bukan hanya merangkumi kursus-kursus "*hard-skills*" tetapi turut meliputi "*soft-skills*".
4. IKON TVET KSM ini mempunyai peranan penting dalam menarik minat generasi muda untuk menceburi bidang TVET sebagai persiapan sebelum menceburi pasaran pekerjaan. Pengalaman dan kreativiti yang dimiliki oleh beliau dapat dimanfaatkan dalam mempromosi bidang TVET khususnya bagi menerangkan kebaikan dan potensi bidang ini kepada masyarakat.

SOALAN NO : 10

5. Kejayaan beliau menunjukkan bahawa seseorang individu mampu menjadi pakar dalam sesuatu bidang dengan syarat mereka tekun mendalami ilmu dan kemahiran menerusi *life long learning* dan pelbagai pendekatan pembelajaran. Kementerian yakin beliau dapat membantu dalam mengetengahkan idea-idea baru dan pendekatan yang kreatif serta berimpak tinggi untuk secara berterusan mempromosikan TVET ke seluruh negara. Pelbagai program promosi publisiti dan kesedaran sedang diatur untuk melibatkan penyertaan saudara Yusry termasuk untuk menjenamakan semula “*Skills Malaysia*” bagi menarik minat belia di bidang kemahiran.

6. Kejayaan IKON TVET KSM dalam bidang seni, daripada muzik hingga lakonan, selain penerbitan filem diyakini dapat menjadi inspirasi dan sekaligus meningkatkan kesedaran masyarakat terutama ibu bapa mengenai potensi bidang TVET untuk masa depan anak-anak.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

**PERTANYAAN : PERTANYAAN - PERTANYAAN
LISAN**

DARIPADA : DATUK ROZMAN BIN ISLI [LABUAN]

TARIKH : 7 NOVEMBER 2019 (KHAMIS)

SOALAN NO. 28

DATUK ROZMAN BIN ISLI [LABUAN] minta **PERDANA MENTERI** menyatakan bilakah penggantian baharu bagi masjid/surau yang telah uzur di Labuan seperti Masjid Adam Kampung Lajau, Masjid Kampung Bebuloh, Masjid Pangkalan Tentera Udara, Membedai, Surau Kampung Batu Arang, Masjid Kampung Ranche-Ranche, Masjid Kampung Bukit Kalam, Masjid Kampung Sungai Lada, Surau Kampung Bukit Kuda, Surau Kampung Nagalang, Surau Kampung Kilan dan pembesaran Masjid Nurul Islam, Bandar Labuan.

**JAWAPAN: (YB. PUAN HAJAH FUZIAH BINTI SALLEH,
TIMBALAN MENTERI DI JABATAN PERDANA
MENTERI)**

Tuan Yang Dipertua, Untuk makluman Ahli Yang Berhormat,

(i) Berkenaan isu pembinaan masjid dan surau bagi **Masjid Ar-Rahman, Kampung Sungai Lada** dan **Surau Nurul Islam, Pusat Bandar**, projek-

projek ini belum lagi dilaksanakan. Mesyuarat penyelarasan JAWI-MAIWP pada Jun 2018 memutuskan agar semua projek baru yang belum ada komitmen ditangguhkan. JAWI dan MAIWP akan mengenalpasti semula serta mencari jalan penyelesaian terhadap status projek-projek yang ditangguhkan ini.

(ii) Sebutharga bagi kerja-kerja pembaikan dan naiktaraf **Surau Ar-Raudhah, Kampung Bukit Kuda** telah dilaksanakan pada 23 Oktober 2017 dengan anggaran kos sebanyak RM185,987.00. Manakala, sebutharga bagi kerja-kerja baikpulih dan selenggara bumbung, tandas tambahan serta kerja-kerja berkaitan bagi **Masjid Ranche-Ranche Darat, Kampung Ranche-Ranche** telah dilaksanakan pada 29 Mei 2015 dengan anggaran kos sebanyak RM268,900.00.

(iii) Kerja-kerja membaikpulih dan penyelenggaraan bagi **Surau Al-Irshad, Kampung Kilan Pulau Akar** dan **Surau Kerupang/Nagalang Kampung Nagalang** akan dimasukkan dalam perancangan Sebutharga Kerja JAWI bagi tahun 2020.

(iv) Tiada permohonan rasmi dikemukakan bagi cadangan pembinaan baharu bagi **Masjid Al-Falah, Kampung Bukit Kalam; Masjid Bebuloh Darat, Kampung Bebuloh; dan Masjid Jamek Adam, Kampung Lajau**. Jabatan ini telah membuat lawatan tapak pada awal Oktober 2019 untuk melihat keadaan premis dan akan menilai semula keperluan bagi pembinaan baharu bagi premis-premis tersebut sebelum diangkat untuk kelulusan.

(v) Cadangan pembinaan baharu bagi **Surau Nurhidayah, Kampung Batu Arang** akan dikemukakan dalam permohonan Rancangan Malaysia Ke-12 (RMK12) setelah mendapat persetujuan daripada pihak-pihak yang berkaitan.

(vi) Bagi **Masjid Pengkalan Tentera Udara, Membedai**, Majlis Agama Islam Wilayah Persekutuan (MAIWP) telah menyerahkan surat permohonan penyerahan semula tanah kepada PTG Labuan bagi tujuan pembinaan Kompleks Islam TUDM. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 7 NOVEMBER 2019 (KHAMIS)

SOALAN

Minta **MENTERI BELIA DAN SUKAN** menyatakan perancangan pihak Kementerian untuk pembangunan belia melalui sukan di Sarawak dan apakah program-program yang ada untuk negeri Sarawak.

JAWAPAN

Yang di-Pertua,

1. Selaras dengan Agenda kerajaan Wawasan Kemakmuran Bersama (WKB), Kementerian akan memberikan penekanan khusus bagi membangunkan infra sukan, program sukan dan belia bagi pembangunan belia di luar bandar khususnya di negeri Sarawak dan Sabah. Pada tahun hadapan, RM100 juta diperuntukkan untuk pembangunan infra sukan kecil tetapi berimpak tinggi yang akan tertumpu di kawasan luar bandar dan fokusnya akan diberikan kepada negeri Sarawak dan Sabah.
2. Pada masa yang sama, belanjawan 2020 melibatkan penambahan peruntukan penyelenggaraan yang juga akan ditumpukan kepada negeri Sarawak, yang mana terdapat banyak infra sukan yang telah siap dibina tetapi berada dalam keadaan uzur.

SOALAN NO : 12

3. Selain itu, di bawah program TVET, melalui Institut Kemahiran Belia Negara (IKBN) Miri, di Sarawak yang menunjukkan kajian kebolehpasaran graduan pada tahap yang memberangsangkan iaitu 92.3%. IKBN Miri bukan sahaja fokus kepada anak muda jurusan TVET tetapi juga membuka ruang kepada belia berisiko. Pada tahun ini Kementerian telah memulakan Program *MyFuture Youth Plus* di IKBN Miri turut memberikan peluang kepada golongan belia minoriti dan belia berisiko menerusi kursus jangka masa pendek yang ditawarkan supaya kebolehpasaran mereka dapat ditingkatkan sekaligus mengelakkan anak muda terdedah kepada gejala sosial.
4. Bagi program sedia ada kementerian seperti Felo Perdana dan Parlimen Belia yang telah diasaskan sebelum ini, kementerian telah menambahkan kuota untuk golongan B40 serta kuota secukupnya untuk negeri Sabah dan Sarawak. Inisiatif ini juga terpakai bagi program Felo Korporat melibatkan anak-anak muda yang terpilih diletakkan di bawah bimbingan Ketua Pegawai Eksekutif (CEO) dan *Chairman* bagi Syarikat Berkaitan Kerajaan (GLC) serta syarikat-syarikat gergasi di Malaysia.
5. Dalam bidang sukan atau sukan massa, Kementerian telah melaksanakan Bulan Sukan Negara selama sebulan, iaitu sepanjang Oktober 2019, melibatkan program-program yang telah dijalankan di seluruh negeri Sarawak.
6. Bagi tahun hadapan, Kementerian, apabila diberikan peruntukan tambahan iaitu daripada 15 juta kepada 45 juta bagi Program Pembangunan Bola Sepak Negara Malaysia (NFDP), tumpuannya juga akan diberikan kepada pembangunan akar umbi satelit di negeri Sarawak dan Sabah yang sebelum ini tidak mendapat pembelaan yang sewajarnya. Perkara yang sama juga akan dilakukan apabila penambahan belanjawan untuk bajet e-sukan daripada RM10 juta kepada RM20 juta yang akan dimanfaatkan sepenuhnya supaya pembangunan sukan dan belia tidak sahaja tertumpu di kawasan bandar dan kawasan Lembah Klang, tetapi juga akan diagihkan seadil mungkin. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SRI DR. SANTHARA [SEGAMAT]

TARIKH : 7 NOVEMBER 2019 (KHAMIS)

SOALAN NO. 13

Minta **MENTERI AIR, TANAH DAN SUMBER ASLI** menyatakan apakah projek terakhir tebatan banjir di Sungai Siput, Segamat. Adakah ia akan dilaksanakan, kerana semua fasa (6 fasa) yang lain telah disiapkan. Jika ya, bila dan mengapa kelewatan sebelum ini.

JAWAPAN

Tuan Yang di-Pertua,

1. Projek terakhir tebatan banjir bagi Sungai Segamat, Johor adalah Rancangan Tebatan Banjir Lembangan Sungai Muar, Johor – Pembinaan Lencongan Banjir Sungai Segamat-Sungai Genuang dan Kerja-Kerja Berkaitan, Segamat yang telah bermula pada 19 Mac 2014 dan siap pada 15 Disember 2015.
2. Kementerian Air Tanah dan Sumber Asli (KATS) melalui Jabatan Pengairan dan Saliran (JPS) telah membuat permohonan projek baru bagi RTB Sungai Siput, Sungai Jementah dan Sungai Legeh, Johor. Sekiranya permohonan diluluskan, projek ini akan dilaksanakan dalam RMKe-12 bermula dengan kerja-kerja awalan iaitu rekabentuk terperinci, kerja-kerja pengukuran dan kerja-kerja penyiasatan tanah.
3. Projek RTB bagi Sungai Siput telah dimohon semasa permohonan projek RMKe-11, namun keutamaan diberi untuk menyiapkan 6 fasa projek RTB di Sungai Segamat memandangkan kawasan tersebut lebih kritikal. Projek ini tidak tergendala sepertimana dinyatakan tetapi belum lagi diluluskan berbanding projek-projek lain yang lebih kritikal dan mendesak dengan keupayaan peruntukan yang ada.
4. Kementerian sememangnya komited dalam menangani masalah banjir bukan sahaja di Daerah Segamat malah semua isu banjir di seluruh Negara.

Sekian, terima kasih

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

DARIPADA : DATUK AARON AGO DAGANG [KANOWIT]

TARIKH : 7 NOVEMBER 2019 (KHAMIS)

SOALAN

DATUK AARON AGO DAGANG [KANOWIT] minta **MENTERI INDUSTRI UTAMA** menyatakan jumlah peruntukan dan bantuan subsidi tahun 2019 untuk pekebun kecil (sawit, getah, lada, koko) di seluruh negara dan di Sarawak (tidak termasuk FELDA, RISDA, SALCRA). Berapakah jumlah pekebun kecil yang mendapat bantuan subsidi ini mengikut negeri.

JAWAPAN

Tuan Yang di-Pertua,

Terdapat beberapa insentif dan bantuan yang telah disediakan kepada pekebun kecil oleh pihak Kerajaan. Insentif dan bantuan yang telah diberikan kepada pekebun kecil sawit dan getah adalah seperti berikut:

- (i) bantuan Skim Tanam Baru Sawit Pekebun Kecil Persendirian (TBSPK) dengan geran peruntukan berjumlah RM20 juta dan melibatkan seramai 4,765 orang pekebun kecil seluruh Malaysia;
- (ii) bantuan skim Insentif Integrasi Ternakan dengan Sawit (ITe) dengan peruntukan sebanyak RM10.7 juta dan melibatkan seramai 215 orang pekebun kecil sehingga 30 September 2019;
- (iii) bantuan skim pemerkasaan pekebun kecil bagi pembinaan pusat timbang buah tandan segar (BTS) di bawah selian Koperasi Penanam Sawit Mampan (KPSM) dengan jumlah peruntukan sebanyak RM13 juta. Pada tahun 2019, RM3.5 juta dana telah disalurkan bagi skim ini. Pihak Kerajaan juga telah memperuntukkan skim modal pusingan

SOALAN NO : 14

sebanyak RM1 juta bagi 10 pusat timbang dengan kadar RM100,000 bagi setiap pusat timbang. Sehingga Mei 2019, seramai 5,243 pekebun kecil yang menjadi ahli KPSM telah menerima manfaat pelaksanaan skim ini;

- (iv) bantuan pembelian mesin CANTAS iaitu alat bermotor penuai BTS sawit dengan peruntukan sebanyak RM1,000 bagi pembelian setiap satu unit CANTAS. Sehingga kini, sebanyak 4,808 unit CANTAS telah dijual melibatkan peruntukan sebanyak RM4.8 juta;
- (v) bantuan pensijilan Minyak Sawit Mampan Malaysia (MSPO) yang merangkumi bantuan kos yuran pensijilan, pembelian peralatan perlindungan diri (PPE) dan pembinaan rak bahan kimia. Peruntukan yang telah dibelanjakan bagi tujuan ini adalah sebanyak RM33.6 juta dan melibatkan seramai 16,000 orang pekebun kecil;
- (vi) bantuan Insentif Pengeluaran Getah (IPG) berjumlah RM71.37 juta yang telah memberi manfaat kepada 90,208 pekebun kecil; dan
- (vii) bantuan tanam baru getah di bawah Projek Berimpak Tinggi (HIP) berjumlah RM8.25 juta dan RM19.18 juta di bawah peruntukan RMK-10 dan RMK-11. Bantuan ini telah diterima oleh 19,121 pekebun kecil getah di Sarawak.

Tuan Yang di-Pertua,

Bagi tahun 2019, Kerajaan melalui Lembaga Lada Malaysia (MPB) menyalurkan peruntukan untuk pelbagai bentuk bantuan seperti input dan peralatan pertanian, latihan serta kursus kepada pekebun lada di bawah Program Pembangunan Kawasan Penanaman Baharu Lada yang melibatkan peruntukan sebanyak RM10 juta. Bilangan pekebun kecil yang mendapat bantuan bagi tahun 2019 adalah seramai 5,723 orang.

Manakala bagi komoditi koko pula, Lembaga Koko Malaysia (LKM) menyalurkan bantuan melalui program pembangunan rangkaian kluster koko berjumlah RM15.96 juta dan melibatkan seramai 1,862 pekebun kecil koko. Selain itu, seramai 3,373 pekebun kecil juga telah menerima bantuan melalui program peningkatan produktiviti koko dengan jumlah peruntukan sebanyak RM7.55 juta. Sekian terima kasih.

**JUMLAH PERUNTUKAN BANTUAN SUBSIDI YANG DITERIMA OLEH
PEKEBUN KECIL MENGIKUT NEGERI BAGI TAHUN 2019**

Negeri/Komoditi	Sawit				Getah	Lada	Koko
	TBSPK	ITa	ITe	MSPO			
Johor	121	377	63	9,911	4,683	13	812
Kedah		11	4		10,760	3	
Kelantan		4	12		22,368	2	
Melaka		26	4		2,149	1	
Negeri sembilan		63	4		3,324	-	
Pahang		74	55		7,926	-	
Perak		261	22		3,039	7	
Perlis		0	-		419	-	
Pulau pinang		1	-		24	1	
Selangor		97	6		271	-	
Terengganu		14	3		3,435	2	
Sarawak	516	143	10	4,166	650	5,581	1,170
Sabah	135	70	32	1,979	31,160	113	3,044
Jumlah	772	1,141	215	16,056	90,208	5,723	5,026

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 7 NOVEMBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan apakah perancangan pembangunan infrastruktur dan kemudahan yang bakal dibina dan disediakan dalam masa terdekat terutamanya pembukaan Kompleks Imigresen, Kastam, Kuarantin dan Keselamatan (ICQS) di sempadan Malaysia/Indonesia di Serudong, Kalabakan dalamantisipasi pemindahan ibukota dan pusat pentadbiran negara Republik Indonesia ke Kalimantan Timur.

JAWAPAN

Tuan Yang di-Pertua,

Untuk makluman Ahli Yang Berhormat, kawalan dan keselamatan di sempadan sentiasa menjadi keutamaan Kerajaan demi melindungi keselamatan dan kepentingan ekonomi negara. Kerjasama antara agensi melalui operasi dan rondaan bersama oleh agensi penguatkuasaan dan keselamatan telah membantu meningkatkan kawalan di pintu masuk dan keluar negara.

Pada masa ini, cadangan untuk mewujudkan Kompleks ICQS di Serudong, Kalabakan masih belum diperhalusi di peringkat Kerajaan kerana perancangan bagi pemindahan ibu kota dan pusat pentadbiran

NO. SOALAN : 15

negara Republik Indonesia ke Kalimantan Timur masih belum dilaksanakan.

Keperluan sebenar untuk mewujudkan kompleks ICQS ini hanya akan dapat dinilai setelah pusat pentadbiran baharu Indonesia direalisasikan. Sehubungan itu, tiada sebarang keperluan yang mendesak pada masa ini untuk pintu masuk baharu tersebut dibuka. Sekiranya terdapat keperluan pewujudan ICQS tersebut, permohonan hendaklah dikemukakan kepada Kementerian Dalam Negeri bagi penyediaan peruntukan di dalam Rancangan Malaysia Kedua Belas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB DATO' HAJI MOHD. SALIM SHARIF
[JEMPOL]**

TARIKH : 7 NOVEMBER 2019 (KHAMIS)

SOALAN

Minta **PERDANA MENTERI** menyatakan status halal produk minuman Bubble Tea yang membanjiri pasaran negara dan tindakan Kerajaan bagi mengelakkan kekeliruan dalam kalangan umat Islam selaku pengguna serta kesan minuman tersebut terhadap kesihatan.

JAWAPAN: (YB PUAN HAJJAH FUZIAH SALLEH, TIMBALAN MENTERI DI JABATAN PERDANA MENTERI)

Tuan Yang di-Pertua,

1. Untuk makluman Ahli Yang Berhormat, Kerajaan melaksanakan sistem pensijilan halal Malaysia bagi membantu pengguna membuat pilihan dan mengenal pasti status halal sesuatu produk. Aspek halal, kualiti, keselamatan dan kebersihan atau dengan kata lain *tayyib* adalah menjadi asas kepada pensijilan halal. Bubble Tea bukanlah sejenis jenama malah ia adalah sejenis produk yang dihasilkan berdasarkan komponen ramuan. Sekiranya bubble tea yang dihasilkan daripada ramuan yang dipastikan halal atau mempunyai sijil halal serta memenuhi syarat dan mematuhi segala prosedur yang ditetapkan layak untuk dipersijilkan halal.

2. Bahan asas bagi “bubble tea” ini adalah diperbuat daripada beberapa bahan yang mana komponen utamanya adalah dari tepung ubi. Dalam hal ini, masyarakat pengguna perlu peka dan bijak memilih makanan dan minuman serta barang-barang keperluan yang berada di pasaran yang telah disahkan halal oleh pihak yang berautoriti dan juga yang badan pensijilan halal yang diiktiraf oleh JAKIM. Para pengguna juga boleh menyemak status halal bagi produk-produk bubble tea yang telah mendapat pensijilan halal ini melalui direktori halal di www.halal.gov.my atau melalui aplikasi telefon pintar iaitu “SMARTHALAL” dan “VERIFY HALAL”.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJAH MAS ERMIEYATI BINTI
SAMSUDIN [MASJID TANAH]**

TARIKH : 7 NOVEMBER 2019 (KHAMIS)

SOALAN NO. 17

Minta **MENTERI AIR, TANAH DAN SUMBER ASLI** menyatakan status terkini Projek Empangan Sungai Jerneh, Lubok Cina, Melaka.

JAWAPAN

Tuan Yang di-Pertua,

Untuk makluman Ahli Yang Berhormat, Makmal Kejuruteraan Nilai projek ini telah diadakan pada 1 hingga 5 Julai 2019. Hasil dari makmal tersebut mendapati terdapat keperluan penambahan kos sebanyak 22.55% iaitu peningkatan sebanyak RM36,799,244.95 berbanding kos yang telah diluluskan terdahulu iaitu sebanyak RM163,214,591.05. Kementerian sedang dalam tindakan untuk mendapatkan kelulusan pertambahan kos tersebut daripada Kementerian Hal Ehwal Ekonomi. Sekiranya kelulusan pertambahan kos diperolehi pada bulan Oktober 2019, pelaksanaan tender boleh diteruskan seperti mana yang dijadualkan iaitu pada bulan November 2019.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN RAMLI BIN DATO' MOHD NOR
[CAMERON HIGHLANDS]**

TARIKH : 7 NOVEMBER 2019

SOALAN NO. 18

Minta **PERDANA MENTERI** menyatakan berkaitan isu bayaran kepada pengusaha pengangkutan bas sekolah bagi masyarakat Orang Asli yang tertunggak selama 5 bulan sama ada sudah dijelaskan atau belum.

**JAWAPAN : YB SENATOR TUAN WAYTHA MOORTHY A/L
PONNUSAMY,
MENTERI DI JABATAN PERDANA MENTERI**

Tuan Yang di-Pertua,

Kontrak Pengangkutan Pelajar Orang Asli bagi negeri Selangor/ Wilayah Persekutuan, Perak/ Kedah, Pahang dan Johor tamat antara November dan Disember 2018. Walau bagaimanapun, permohonan pelanjutan kontrak ini tidak dapat dilaksanakan kerana pelaksanaan rasionalisasi agensi kerajaan pada tahun 2019 yang turut melibatkan perpindahan JAKOA ke JPM. Pelaksanaan proses migrasi JAKOA ke JPM mengambil masa sehingga April 2019. JAKOA telah diberi kelulusan oleh MOF untuk membuat pembayaran luar kontrak bagi bulan Januari hingga Mac 2019.

Manakala perkhidmatan bagi bulan April hingga Jun 2019, JAKOA telah diberikan kelulusan secara rundingan terus. Proses rundingan terus mengambil masa yang lebih panjang kerana melibatkan seramai

NO. SOALAN : 18

174 pengusaha dan faktor harga yang ditawarkan oleh pengusaha lebih tinggi dari harga anggaran jabatan. Selain itu, kelewatan turut berpunca dari perubahan spesifikasi mengikut perubahan geografi jalan, perubahan bilangan murid hadir ke sekolah setiap bulan serta pengusaha tidak memenuhi syarat-syarat spesifikasi kerajaan.

Keputusan rundingan harga tersebut telah dibawa untuk dimuktamadkan oleh Lembaga Perolehan Jabatan Perdana Menteri dan telah diluluskan pada 2 Ogos 2019. Namun, pembayaran bagi bulan April hingga Jun 2019 tidak dapat diproses melalui sistem ePerolehan kerana tempoh perkhidmatannya telah tamat.

Selaras dengan kelulusan yang diberi, JAKOA telah memaklumkan keputusan rundingan harga tersebut untuk kelulusan akhir agensi pusat. Pada masa yang sama, JAKOA turut memohon kelulusan pembayaran khas melalui sistem iGFMAS oleh kerana tempoh perkhidmatan ini yang telah tamat. Permohonan ini adalah selaras dengan peraturan kewangan semasa yang berkuatkuasa.

Pihak JAKOA telah selesai membuat pembayaran bagi bulan April hingga Jun 2019 kepada 174 orang pengusaha secara berperingkat sehingga 4 September 2019 melibatkan 484 bil/ tuntutan. Pihak JAKOA sentiasa komited dalam memastikan kebajikan masyarakat Orang Asli terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN JONATHAN YASIN [RANAU]

TARIKH : 7 NOVEMBER 2019 (KHAMIS)

SOALAN NO. 19

minta **MENTERI HAL EHWAL EKONOMI** menyatakan sejauh manakah Kerajaan Persekutuan telah mengambil kira pandangan dari pihak Kerajaan negeri Sabah, keperluan, keutamaan dan isu-isu pembangunan di Sabah dalam menyediakan Rancangan Malaysia ke-12 (2021-2025).

JAWAPAN

Tuan Yang di-Pertua,

Untuk makluman Ahli Yang Berhormat, Penyediaan Rancangan Malaysia Keduabelas (RMKe-12) yang merangkumi tempoh 2021-2025 akan digubal untuk menjamin pembangunan sosio-ekonomi yang mampan dan saksama. Penyediaan RMKe-12 ini antara lain, meliputi aspek pembangunan wilayah yang seimbang supaya pertumbuhan ekonomi tidak hanya tertumpu kepada sesuatu wilayah atau negeri sahaja. Ini adalah selari dengan matlamat Wawasan Kemakmuran Bersama iaitu:

- a. Merapatkan jurang ekonomi antara kelas pendapatan, kaum dan wilayah bagi membawa bersama rakyat yang ketinggalan supaya terbela dan diperkasa untuk menangani ketidaksamaan;

- b. Membangunkan sebuah ekonomi yang terstruktur semula, dengan memastikan ekonomi ini dapat berkembang secara progresif melalui penumpuan kepada ekonomi yang bernilai tinggi; serta
- c. Membina Malaysia sebagai sebuah negara yang bersatu, makmur dan bermaruah seterusnya muncul sebagai paksi ekonomi Asia.

Justeru itu, Kementerian ini telah mengambil satu inisiatif mengadakan Sesi Libat Urus Penyediaan RMKe-12 bersama Kerajaan Negeri termasuk Sabah yang telah dilaksanakan 26 Julai 2019.

Untuk makluman Ahli Yang Berhormat, dalam sesi libat urus tersebut, pandangan daripada Kerajaan Negeri Sabah, keperluan, keutamaan dan isu-isu pembangunan di Sabah diambilkira dalam mendasari penyediaan RMKe-12 ini dan antaranya adalah meliputi sektor pelancongan, pengurusan persekitaran termasuk sumber asli daratan dan laut, pertanian dan perindustrian.

Kerajaan Persekutuan menerusi MEA mengambil maklum akan keperluan negeri Sabah ini dan akan meneliti semula keperluan tersebut dalam memberi keutamaan pelaksanaan projek dan kedudukan kewangan semasa Kerajaan Persekutuan.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB DATUK SERI DR. ADHAM BIN BABA
[TENGGARA]

TARIKH : 07 NOVEMBER 2019

SOALAN

Minta **MENTERI SUMBER MANUSIA** menyatakan apakah hasil perbincangan oleh pihak Kementerian tentang visi dan misi dalam penambah baikkan untuk peluang pekerjaan bagi semua lapisan masyarakat dan berapa kalikah pertemuan telah dilakukan oleh pihak Yang Berhormat Menteri bersama rakyat di negara ini.

JAWAPAN

Tuan Yang di-Pertua,

1. Visi dan misi Kerajaan Pakatan Harapan adalah selaras dengan hasrat dalam Manifesto Pakatan Harapan iaitu untuk menyediakan 1 juta peluang pekerjaan dalam masa 5 tahun pertama pentadbiran serta meningkatkan kualiti pekerjaan dan kadar guna tenaga mahir. Bagi mencapai hasrat ini, beberapa inisiatif sedang dan akan dilaksanakan oleh Kerajaan. Antara inisiatif yang sedang dilaksanakan adalah:

- (i) meningkatkan pelaburan nilai tinggi melalui *foreign direct investment* (FDI) dan *domestic direct investment* (DDI) bagi meningkatkan penghasilan pekerjaan yang bersifat *high value jobs* dan *knowledge worker* (k-worker)

SOALAN NO : 20

agar kadar upah yang tinggi dapat dinikmati oleh golongan ini;

- (ii) melaksanakan latihan-latihan kemahiran yang bersifat *internship* seperti latihan Sistem Latihan *Dual* Nasional (SLDN) untuk meningkatkan kebolehpasaran pelajar;
- (iii) menyediakan insentif-insentif untuk syarikat bagi memperbanyakkan elemen-elemen berteknologi tinggi yang dijangka akan meningkatkan jumlah peluang pekerjaan berkemahiran tinggi; dan
- (iv) mengadakan sesi libat urus bersama industri bagi membincangkan isu sekali gus mengambil langkah-langkah untuk mengurangkan kebergantungan terhadap pekerja asing.

2. Selain itu, antara langkah-langkah yang akan diambil oleh Kerajaan adalah seperti beberapa inisiatif yang telah diumumkan dalam Pembentangan Bajet 2020 oleh Menteri Kewangan iaitu:

- (i) penyediaan insentif kewangan untuk menggajikan penganggur, wanita dan warganegara Malaysia bagi menggantikan pekerja asing;
- (ii) meningkatkan insentif bagi program perantisan;
- (iii) kajian semula Akta Kerja untuk meningkatkan tempoh cuti bersalin, perluasan liputan akta dan memasukkan elemen peruntukan anti-diskriminasi dalam pekerjaan;
- (iv) cadangan peningkatan kadar gaji minimum di bandar kepada kadar gaji RM1,200 sebulan; dan

SOALAN NO : 20

- (v) cadangan perluasan KWSP dan SOCSO untuk meliputi pekerja kontrak, sambilan dan golongan yang bekerja sendiri.

3. Untuk makluman Dewan yang mulia ini, Kementerian telah mengadakan pelbagai sesi libat urus antara YB Menteri Sumber Manusia dengan rakyat. Antaranya adalah:

- (i) Hari Bertemu Pelanggan yang diadakan pada setiap hari Selasa di KSM yang mana YB Menteri Sumber Manusia akan turun padang berjumpa rakyat pada hari tersebut bagi mendengar isu-isu yang dibangkitkan sekali gus mengambil pandangan daripada rakyat;
- (ii) Mesyuarat Majlis Penasihat Buruh Kebangsaan(NLAC) yang diadakan setiap bulan bagi membincangkan isu-isu yang melibatkan pekerja dan majikan, dan disusuli dengan mesyuarat Jawatankuasa Teknikal bagi isu-isu spesifik;
- (iii) Mesyuarat YB Menteri Sumber Manusia bersama YB EXCO Sumber Manusia Negeri yang diadakan 2 kali setahun bagi membincangkan potensi bagi meningkatkan kerjasama antara Kerajaan Persekutuan dan Kerajaan Negeri dalam memperkasakan sumber manusia dan memantapkan pentadbiran perburuhan negara; dan
- (iv) Sesi dialog YB Menteri Sumber Manusia bersama Ketua-Ketua Eksekutif Syarikat yang diadakan 2 kali setahun bagi membincangkan isu-isu dalam memelihara keharmonian perhubungan perusahaan dan memastikan liputan jaringan keselamatan sosial yang menyeluruh kepada masyarakat di Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
(WANGSA MAJU)**

TARIKH : 7 NOVEMBER 2019

SOALAN NO. 21

Datin Paduka Dr. Tan Yee Kew (Wangsa Maju) minta **PERDANA MENTERI** menyatakan pencapaian Kerajaan Pakatan Harapan (PH) dalam menunaikan janji manifesto Pilihan Raya Umum Ke-14 dan adakah jawatankuasa khas telah mewujudkan petunjuk indeks prestasi (KPI) dan mengkaji segala janji dapat ditunaikan.

**JAWAPAN: YB TUAN MOHAMED HANIPA BIN MAIDIN, TIMBALAN
MENTERI DI JABATAN PERDANA MENTERI**

Yang di-Pertua,

Jawatankuasa Nasional Janji Kerajaan telah ditubuhkan sebagai mekanisme pemantauan dan penyelarasan Janji Kerajaan. Di samping itu, jawatankuasa peringkat tertinggi yang dipengerusikan oleh YAB Perdana Menteri itu juga berfungsi menilai dan membuat keputusan ke atas cadangan dan syor penyelesaian untuk isu-isu yang berbangkit bagi memastikan *milestone* pencapaian seperti yang telah ditetapkan. Sebanyak 464 inisiatif daripada 107 janji yang terkandung di dalam Janji Kerajaan. Apa-apa pengumuman mengenai pencapaian Janji Kerajaan akan disampaikan oleh YAB Perdana Menteri dari semasa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MOHD SHAHAR BIN ABDULLAH
[PAYA BESAR]**

TARIKH : 7 NOVEMBER 2019 [KHAMIS]

SOALAN

Minta **MENTERI HAL EHWAL EKONOMI** menyatakan:-

- (a) adakah Kerajaan mempraktikkan skim gaji minimum kepada peneroka FELDA supaya mereka tidak mendapat gaji di bawah paras RM1,500; dan
- (b) adakah terdapat cadangan menanggung bayaran hutang peneroka yang dibuat melalui potongan gaji sehingga harga sawit kembali tinggi dan stabil.

JAWAPAN

Tuan Yang di-Pertua,

- 1. Untuk makluman Ahli Yang Berhormat, Dasar Pendapatan Minima Peneroka telah diperkenalkan oleh FELDA sejak Mei 1988 iaitu sebanyak RM350 pada ketika itu dan dinaikkan kepada RM600 pada tahun 2000 serta kepada RM1,000 pada tahun 2009.
- 2. Di bawah dasar ini peneroka tidak dikenakan apa-apa potongan yang berkaitan dengan hutang pembangunan kebun sekiranya

pendapatan pada sesuatu bulan tidak mencapai pendapatan minimum setelah ditolak kos operasi kebun. Kos operasi kebun meliputi urusan mengendali kebun.

3. Pada masa ini belum ada polisi atau pekeliling berkaitan penangguhan potongan peneroka selain Dasar Pendapatan Minima Peneroka. Sekiranya pendapatan kasar peneroka kurang dari RM1,000 sebulan setelah ditolak kos operasi kebun, potongan hutang kebun akan ditangguhkan (Kos Pembangunan Tanam Semula). Walau bagaimanapun, potongan hutang persendirian seperti Hutang Kedai, Pinjaman Pembesaran Rumah Peneroka, saham FGV dan caruman tanam semula diteruskan seperti biasa.

4. Kos operasi kebun meliputi urusan penuaian, pengangkutan hasil Buah Tandan Segar (BTS), baja (bahan dan upah) serta jalan pertanian. Telah menjadi amalan selama ini bahawa kos operasi kebun wajib ditolak dari hasil. Sekiranya FELDA menangguhkan potongan hutang-hutang tersebut:

- (i) Hutang peneroka semakin bertambah apabila kos operasi semasa setiap bulan tidak dipotong. Selain itu, bayaran FELDA kepada kontraktor yang melaksanakan kerja-kerja ladang juga akan terjejas.
- (ii) Hutang peneroka tidak dapat dikutip dan tertunggak serta menjejaskan aliran tunai FELDA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN JONATHAN YASIN [RANAU]

TARIKH : 7 NOVEMBER 2019 (KHAMIS)

SOALAN

Minta **PERDANA MENTERI** menyatakan bilakah kuasa autonomi berkaitan pendidikan dan perubatan dikembalikan kepada negeri Sabah.

**JAWAPAN: YB TUAN MOHAMED BIN HANIPA, TIMBALAN MENTERI
DI JABATAN PERDANA MENTERI**

Tuan Yang di-Pertua,

Sehingga 23 Julai 2019, sebanyak tujuh isu telah mendapat persetujuan bersama di antara Kerajaan Persekutuan, Kerajaan Negeri Sabah dan Kerajaan Negeri Sarawak. Isu-isu tersebut adalah seperti berikut:

1. Tuntutan duti eksport balak dan hasil hutan
2. Pengedaran gas dan kuasa kawal selia elektrik dan gas
3. Pelaksanaan kerja raya Persekutuan dan Negeri
4. Tenaga buruh
5. Kuasa negeri ke atas isu kesihatan
6. Pentadbiran Pulau Sipadan dan Ligitan
7. Isu pertanian dan perhutanan

Untuk makluman YB Ranau, Jawatankuasa Khas Kabinet Untuk Menyemak Pelaksanaan Perjanjian Malaysia 1963 telah bersetuju supaya satu jawatankuasa berasingan diwujudkan bagi membincangkan

NO. SOALAN : 23

dengan lebih lanjut berhubung isu pengurusan kesihatan di Sabah dan Sarawak.

Manakala berhubung isu autonomi pendidikan, perkara ini tidak dibincangkan di bawah Jawatan Kuasa Khas Kabinet ini. Ini selaras dengan keputusan Mesyuarat Jemaah Menteri pada 5 September 2018 yang memutuskan supaya perkara ini dibincangkan dalam forum berasingan.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. HAJI ISMAIL BIN MOHAMED
SAID [KUALA KRAU]**

TARIKH : 7 NOVEMBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan tentang pelan Wawasan Kemakmuran Bersama 2021-2030 dengan lebih terperinci. Apakah manfaat dan kesan drastik kepada rakyat yang ketika ini cukup tertekan dengan masalah ekonomi akibat peningkatan kos sara hidup.

JAWAPAN

Tuan Yang di-Pertua,

1. Kerajaan telah merangka satu wawasan baharu iaitu Wawasan Kemakmuran Bersama 2030 (WKB) yang telah dilancarkan oleh YAB Perdana Menteri pada 5 Oktober 2019. Ia adalah strategi yang lebih holistik bermula daripada tahun 2021 hingga 2030.
2. Objektif pertama WKB adalah untuk menumpukan kepada ekonomi ke arah yang lebih progresif, berpaksikan ilmu dan bernilai tinggi dengan penyertaan masyarakat yang menyeluruh di semua peringkat. Dalam konteks ini, Kerajaan akan menumpukan kepada ekonomi bernilai tinggi yang mewujudkan peluang pekerjaan berpendapatan tinggi untuk rakyat seterusnya meningkatkan kuasa membeli rakyat.

3. Selain memperkuat sektor pertumbuhan ekonomi sedia ada, tumpuan akan diberi untuk mempergiat aktiviti pertumbuhan ekonomi masa hadapan yang bernilai tinggi dan mempunyai potensi untuk berkembang pesat sejajar dengan perubahan teknologi. Penstrukturan semula ekonomi ini akan memberi manfaat kepada seluruh rakyat.

4. Objektif kedua WKB menumpukan kepada usaha untuk merapatkan jurang ekonomi di antara kelas pendapatan, wilayah, rangkaian bekalan dan etnik. Bagi menangani jurang ekonomi antara kumpulan pendapatan, Kerajaan yakin tumpuan kepada aktiviti ekonomi bernilai tinggi dan pewujudan pekerjaan berpendapatan tinggi akan menyumbang kepada usaha untuk merapatkan jurang ekonomi di antara kumpulan pendapatan. Selain daripada itu, Teras Strategik 5 WKB iaitu Kesejahteraan Sosial memberi penekanan kepada kebajikan semua kelompok masyarakat terutamanya golongan rentan ekonomi dan kumpulan isi rumah B40. Antara strategi yang akan dilaksanakan termasuklah memperkasakan sistem perlindungan sosial, menggalakkan program kesedaran kewangan dan mengintegrasikan pangkalan data bagi memastikan bantuan dapat diberikan kepada kumpulan sasaran.

5. Dalam merapatkan jurang ekonomi antara wilayah, Kerajaan komited untuk memastikan pembangunan dilakukan secara saksama dan inklusif bagi memastikan pembangunan ekonomi tidak tertumpu di kawasan tertentu sahaja. Dalam hubungan ini, pemetaan kawasan titik panas ekonomi, dengan izin, *economic hot spots* akan dilaksanakan bagi mengenalpasti kawasan luar bandar yang berpotensi sebagai pusat aktiviti ekonomi yang mampan. Pemilihan strategi bagi setiap lokasi yang ditetapkan adalah berasaskan kepada kekuatan dan keunikan kawasan tersebut. Pengurusan ekonomi yang teragih dan adil akan dilaksanakan dengan memperkuat logistik dan fasilitasi perdagangan, meningkatkan kebolehcapaian internet serta menambah baik infrastruktur awam meliputi jaringan jalan raya di kawasan luar bandar dan pedalaman.

6. Dari segi rangkaian bekalan, data menunjukkan masih terdapat jurang yang lebar dalam pelbagai lapisan rangkaian bekalan. Sebagai contoh, Kajian Pasaran Sektor Makanan yang dijalankan oleh MyCC berkaitan pemasaran ikan mendapati pemborong utama menaikkan

harga sehingga enam kali dalam rantai pemasaran ikan tempatan dengan mengambil keuntungan antara 60% hingga 75% di setiap lapisan rantai. Dalam rantai ini, nelayan merupakan kumpulan yang paling sedikit mendapat keuntungan. Perkara ini tidak setimpal dengan titik peluh nelayan untuk mencari rezeki. Sehubungan itu, Kerajaan akan memastikan penyertaan yang lebih adil dalam rantai bekalan.

7. Sementara itu, seiring dengan semangat Wawasan Kemakmuran Bersama, dalam meningkatkan taraf hidup rakyat dalam berdepan dengan peningkatan kos sara hidup pelbagai usaha telah pun dijalankan oleh Kementerian dan Agensi. Usaha-usaha tersebut termasuklah:

- I. Melaksanakan dasar yang bertujuan untuk membantu dalam meningkatkan pendapatan rakyat khususnya isi rumah B40. Oleh yang demikian, menyedari keperluan dan kepentingan untuk memastikan kadar gaji dapat menampung suasana kenaikan kos sara hidup, Kerajaan mencadangkan supaya gaji minimum ditingkatkan pada kadar RM1,200 sebulan hanya di wilayah bandar-bandar utama berkuat kuasa pada tahun 2020.
- II. Mengadakan pelbagai program bagi menangani masalah pengangguran dan kebolehpasaran graduan. Bagi mengelakkan golongan ini daripada menghadapi masalah kos sara hidup, Kerajaan telah melaksanakan pelbagai langkah intervensi. Antara intervensi-intervensi yang telah dilaksanakan untuk meningkatkan kebolehpasaran graduan adalah Kerajaan akan melaksanakan dua program yang dibiayai melalui dana Pembangunan Sumber Manusia Berhad (HRDF) iaitu *Apprenticeship dan Graduate Enhancement Programme For Employability* (GENERATE). Program ini dijangka akan dapat meningkatkan peluang pekerjaan bagi seramai 4,000 orang belia lepasan sekolah dan graduan dengan peruntukan RM 20 juta berbentuk geran sepadan.

- III. Melaksanakan pelbagai program bantuan isi rumah B40 bagi meringankan beban kos sara hidup. Program ini merangkumi bantuan yang disalurkan dalam bentuk tunai, barangan, jaminan dan perkhidmatan. Antara program-program tersebut adalah seperti Bantuan Sara Hidup (BSH); pelaksanaan program yang membantu pembelian rumah seperti pengecualian duti setem serta kemudahan pinjaman bagi pembeli rumah pertama dan penyediaan kedai harga patut seperti Coop Mart.

8. Segala usaha Kerajaan ini adalah seiring dengan objektif Wawasan Kemakmuran Bersama dalam memastikan Malaysia dapat menjadi sebagai sebuah negara yang bersatu, makmur dan bermaruah seterusnya muncul sebagai paksi ekonomi Asia. Ini adalah untuk memastikan seluruh rakyat Malaysia mengecapi taraf hidup wajar atau dengan izin, "*decent standard of living*" menjelang tahun 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HASSAN BIN ABDUL KARIM
[PASIR GUDANG]**

TARIKH : 7 NOVEMBER 2019 (KHAMIS)

SOALAN

Minta **PERDANA MENTERI** menyatakan apakah Kerajaan mempunyai cadangan untuk mengkaji Perkara 55 Perlembagaan Persekutuan tentang kuasa Yang di-Pertuan Agong untuk memprorog Parlimen selepas melihat apa yang berlaku di Parlimen United Kingdom baru-baru ini.

**JAWAPAN: YB TUAN MOHAMED BIN HANIPA, TIMBALAN
MENTERI DI JABATAN PERDANA MENTERI**

Tuan Yang di-Pertua,

Pada masa ini Kerajaan tidak bercadang untuk mengkaji Perkara 55(2) Perlembagaan Persekutuan berhubung kuasa Yang di-Pertuan Agong untuk memprorog Parlimen. Ini kerana kuasa tersebut telah dinyatakan dengan jelas dalam Perlembagaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : DATO' TUAN IBRAHIM BIN TUAN MAN
[KUBANG KERIAN]**

TARIKH : 7 NOVEMBER 2019

SOALAN

Minta **MENTERI DI JABATAN PERDANA MENTERI** menyatakan objektif dan fungsi penubuhan sekretariat bersama antara JAKIM dan HDC dalam industri halal.

**JAWAPAN: (YB PUAN HAJJAH FUZIAH SALLEH, TIMBALAN
MENTERI DI JABATAN PERDANA MENTERI)**

Yang di-Pertua,

1. Untuk makluman Yang Berhormat, Mesyuarat Jemaah Menteri pada Februari 2016 telah bersetuju dengan penubuhan Majlis Halal Malaysia (MHM) yang diurusetikan oleh Jabatan Kemajuan Islam Malaysia (JAKIM) Halal Industry Development Corporation (HDC) dan Jabatan Standard Malaysia (JSM). Ianya bertujuan sebagai platform penyelarasan tadbir urus inisiatif halal di Malaysia.

2. Pada 18 September 2019 yang lalu Mesyuarat Jemaah Menteri telah bersetuju supaya struktur tadbir urus Majlis Halal Malaysia (MHM) dijenamakan semula kepada Majlis Pembangunan Industri Halal (MPIH) dengan mengekalkan keahlian sedia ada dan diurusetikan oleh Kementerian Hal Ehwal Ekonomi melalui *Halal Industri Development Corporation* (HDC).

3. Sehubungan itu, dalam struktur baharu ini, JAKIM diberi peranan menguruskan dan menyelaraskan Hal Ehwal Pensijilan Halal yang melibatkan:

- i. Pensijilan halal dalam dan luar negara;
- ii. Regulatori halal;
- iii. Akreditasi halal; dan
- iv. Latihan dan bajet pembangunan kapasiti pensijilan halal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI AHMAD FAIZAL BIN DATO'
AZUMU [TAMBUN]**

TARIKH : 7 NOVEMBER 2019 (KHAMIS)

SOALAN NO. 27

Minta **MENTERI AIR, TANAH DAN SUMBER ASLI** mengulas kesan daripada operasi pengeluaran pasir dasar laut di kawasan luar perairan negeri Perak susulan kelulusan terkini yang dikeluarkan oleh Kementerian.

JAWAPAN

Tuan Yang di-Pertua,

1. Untuk makluman Ahli Yang Berhormat, berdasarkan rekod kelulusan lesen mendapatkan pasir dasar laut di bawah Seksyen 4, Akta Pelantar Benua 1966 yang terkini, tiada pelesen menjalankan operasi pengorekan pasir di kawasan luar perairan Negeri Perak.
2. Namun begitu, Kementerian ini menegaskan bahawa sebarang kelulusan kawasan pengorekan pasir dasar laut di kawasan pelantar benua iaitu di kawasan perairan melebihi tiga (3) batu nautika dari tikas air surut perlu mendapat kelulusan Kajian Penilaian Kesan Ke Atas Sekeliling (*Environmental Impact Assessment*, EIA) selaras dengan Perkara 8(c) dalam Perintah Kualiti Alam Sekeliling (Aktiviti Yang Ditetapkan) (Penilaian Kesan Kepada Alam Sekeliling 1974 sebelum aktiviti pengorekan pasir dilaksanakan bagi memastikan impak kepada alam sekitar dapat ditangani dengan lebih berkesan lagi. Langkah-langkah mitigasi untuk melindungi ekologi hidupan laut, memastikan keselamatan pelayaran dan lain-lain telah diambil kira di dalam Laporan Kajian EIA yang diluluskan oleh Jabatan Alam Sekitar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN HAJAH SITI ZAILAH BINTI MOHD
YUSOFF [RANTAU PANJANG]**

TARIKH : 7 NOVEMBER 2019 (KHAMIS)

SOALAN

Minta **PERDANA MENTERI** menyatakan adakah Kerajaan Persekutuan berhasrat untuk menyaman Kerajaan Negeri Perak bagi mendapatkan pengiktirafan hak tanah adat orang Asli seperti mana saman terhadap Kerajaan Negeri Kelantan.

**JAWAPAN : YB TUAN MOHAMED BIN HANIPA, TIMBALAN MENTERI
DI JABATAN PERDANA MENTERI**

Tuan Yang di-Pertua,

Buat masa ini, tiada tindakan guaman yang difailkan terhadap Kerajaan Negeri Perak berhubung dengan pengiktirafan hak tanah adat orang Asli. Jabatan Peguam Negara juga tidak menerima apa-apa arahan untuk memulakan tindakan guaman terhadap Kerajaan Negeri Perak berhubung dengan isu tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH NANCY SHUKRI
[BATANG SADONG]**

TARIKH : 7 NOVEMBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan jumlah hasil yang diperoleh daripada minyak dan gas yang dihasilkan di Sarawak ketika Petronas memulakan operasi dari tahun 1976 di negeri itu sehingga 31 Disember 2018 dan berapa jumlah daripada hasil itu yang telah kembali ke negeri Sarawak.

JAWAPAN

Tuan Yang di-Pertua,

Untuk makluman Ahli Yang Berhormat, jumlah bayaran hasil daripada minyak dan gas yang telah disalurkan kepada Kerajaan Negeri Sarawak dari tahun 1976 sehingga 31 Disember 2018 adalah sebanyak RM36.3 billion.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TAN SRI DATUK SERI PANGLIMA
HAJI ANNUAR BIN HAJI MUSA [KETEREH]**

TARIKH : 7 NOVEMBER 2019

SOALAN

TAN SRI DATUK SERI PANGLIMA HAJI ANNUAR BIN HAJI MUSA [KETEREH] minta **PERDANA MENTERI** menyatakan apakah yang dimaksudkan dengan perkhidmatan awam yang membebaskan dan adakah saiz perkhidmatan awam akan dikecilkan bagi mengurangkan bebanan kewangan.

JAWAPAN : YB TUAN MOHAMED HANIPA BIN MAIDIN, TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, jumlah keseluruhan perjawatan perkhidmatan awam pada masa kini adalah sebanyak 1.71 juta dengan pengisian sebanyak 1.57 juta (91.5%) yang merangkumi perkhidmatan awam persekutuan, badan berkanun persekutuan, perkhidmatan awam negeri, badan berkanun negeri dan pihak berkuasa tempatan.

Kerajaan berpandangan jumlah perjawatan ini boleh dikurangkan tanpa menjejaskan prestasi penyampaian perkhidmatan supaya selaras dengan sasaran yang ditetapkan di dalam RMKe 11 iaitu mencapai saiz perkhidmatan awam kepada penduduk dengan nisbah 1:20 berbanding 1:19 pada masa sekarang.

Sehubungan itu, Kerajaan dalam proses untuk menstrukturkan semula jumlah perjawatan dalam perkhidmatan awam berdasarkan kedudukan ekonomi negara dan perkembangan teknologi semasa melalui pelbagai kaedah/mekanisme dan langkah antaranya kajian pertindihan fungsi antara jabatan/agensi, rasionalisasi perjawatan, pengoptimuman sumber manusia, serah urus fungsi (*outsourcing*), penyampaian perkhidmatan alternatif (*Alternative Service Delivery*), penswastaan, penggunaan teknologi dan pengisian jawatan secara berhemah mengikut keperluan. Perjawatan yang dikenal pasti untuk dimansuhkan adalah termasuk jawatan kosong yang tidak diperlukan, jawatan di agensi yang mempunyai pertindihan fungsi dan jawatan bagi perkhidmatan yang boleh diautomasi, diserah urus fungsi (*outsourcing*) serta yang boleh digantikan perkhidmatan alternatif.

Sehubungan itu, Kerajaan menjangkakan ianya tidak akan memberi kesan kepada tugas-tugas sedia ada memandangkan jawatan yang dimansuhkan ini merupakan jawatan yang tidak diperlukan dan tidak melibatkan penyandang sedia ada. Tiada pengurangan kakitangan awam sedia ada dalam pelaksanaan dasar ini. Bagi maksud ini, Kerajaan telah menubuhkan Jawatankuasa Cadangan Rasionalisasi Jabatan/Agensi yang diterajui oleh Kementerian Kewangan Malaysia dan Jabatan Perkhidmatan Awam bagi mengenal pasti pertindihan fungsi antara jabatan/agensi dan mencadangkan jabatan/agensi tersebut dirasionalisasikan termasuk penswastaan.

Kerajaan juga berhasrat untuk mewujudkan lebih banyak peluang pekerjaan di sektor swasta dengan gaji yang lebih lumayan bagi mengurangkan pergantungan rakyat terhadap pekerjaan di sektor awam. Sehubungan itu, melalui konsep penswastaan, fungsi-fungsi tertentu yang

dilaksanakan oleh jabatan/agensi kerajaan yang boleh menjana hasil secara konsisten dan berdaya maju adalah berpotensi untuk diswastakan. Melalui penswastaan, keupayaan dan kemampuan untuk menjana pendapatan sendiri dapat dipertingkatkan serta mengurangkan pembiayaan kerajaan terhadap perbelanjaan operasi jabatan/agensi berkenaan.

Dengan perkembangan teknologi terkini, Kerajaan percaya perkhidmatan awam akan lebih produktif apabila pembaziran dihapuskan, pengagihan sumber dilaksanakan dengan cekap dan guna tenaga diganti dengan penggunaan teknologi maklumat serta komputer. Sektor awam sewajarnya hanya memfokuskan kepada penyediaan dasar utama, menentukan arah dan penyediaan perkhidmatan serta tidak terbabit secara aktif dalam aktiviti ekonomi perdagangan di Malaysia.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI ABDUL AZEEZ BIN ABDUL RAHIM
[BALING]**

TARIKH : 7 NOVEMBER 2019 (KHAMIS)

SOALAN

Minta **MENTERI BELIA DAN SUKAN** menyatakan mengenai keputusan Kerajaan bagi menangani isu kadar pengangguran dalam kalangan belia dan hasil kajian Kementerian berkenaan dengan kedudukan tangga gaji baru yang bersesuaian bagi golongan muda.

JAWAPAN

Yang di-Pertua,

1. Untuk makluman Ahli Yang Berhormat, Kajian Kos Sara Hidup Belia dan Keperluan Belia Malaysia pada tahun 2016 oleh Institut Penyelidikan Pembangunan Belia (IYRES) mendapati terdapat 4 cabaran yang menjadi kebimbangan belia antaranya adalah isu pengangguran dan peluang pekerjaan. Berdasarkan statistik Jabatan Perangkaan Malaysia (DOSM), kadar pengangguran belia yang berumur 15 hingga 30 tahun pada tahun 2017 adalah sebanyak 6.7%. Keadaan ini menunjukkan bahawa isu pengangguran belia perlu ditangani dengan segera supaya tidak berlaku peningkatan jurang agihan pendapatan yang akhirnya akan meningkatkan kadar kemiskinan.
2. Sehubungan itu, dalam usaha menangani isu pengangguran dan peluang pekerjaan, Kementerian Belia dan Sukan (KBS) telah memberikan penekanan kepada aspek keusahawanan serta TVET melalui 22 Institusi Latihan Kemahiran Belia dan Sukan (ILKBS). Dalam usaha menangani isu pengangguran belia, KBS sentiasa memastikan bahawa kursus yang ditawarkan di ILKBS adalah bersesuaian dengan penawaran dan permintaan pekerjaan.
3. Pada tahun 2015 sehingga 2019, KBS berjaya menghasilkan graduan seramai 26,456 graduan. Dalam tempoh tersebut, berlaku peningkatan kepada kadar kebolehpasaran meningkatkan graduan ILKBS daripada 80% pada tahun 2013 kepada 93% pada tahun 2018. Ia juga secara tidak langsung meningkatkan gaji purata graduan ILKBS daripada RM1,200 kepada RM1,678.
4. KBS juga telah memperkenalkan beberapa program bagi memberi pendedahan kepada para belia berkenaan dengan ilmu keusahawanan. Program-program ini dibangunkan antara lainnya bertujuan untuk membangunkan ciri-ciri keusahawanan dan memupuk pembudayaan keusahawanan kepada para belia untuk memilih bidang keusahawanan

sebagai kerjaya utama mereka. Antara program keusahawanan yang dilaksanakan oleh KBS adalah *Y-Career*, *Youth Business Expo* (YBEX) dan *Facing Up With Social Entrepreneurship* (FUSE).

5. Pada 1 Januari 2019, Kerajaan telah melaksanakan gaji minimum seragam di seluruh negara pada kadar RM1,100 sebulan (RM5.29 sejam) melalui pewartaan Perintah Gaji Minimum (Pindaan) 2018. Perintah Gaji Minimum (PGM) ini hanya terpakai kepada semua pekerja sektor swasta kecuali pekhidmat domestik dan perantisan. Dengan kenaikan kadar gaji minimum ini maka ia dapat membantu meringankan beban khususnya anak muda ekoran daripada peningkatan kos sara hidup di samping merapatkan jurang sosio-ekonomi antara negeri-negeri di Malaysia.

6. Selain itu, bagi memastikan adanya lebih banyak peluang pekerjaan dengan gaji yang selayaknya kepada anak muda, Mesyuarat Jemaah Menteri pada 11 September 2019 telah bersetuju menubuhkan Jawatankuasa Peluang Pekerjaan Anak Muda yang akan dipengerusikan oleh YAB Perdana Menteri. Jawatankuasa ini terdiri daripada pihak Kerajaan, syarikat berkaitan Kerajaan (GLC), perbankan, penyelidik, dan peneraju industri. Penglibatan pelbagai pihak ini merupakan satu usaha dalam membantu Kerajaan ke arah mencapai mewujudkan 1 juta peluang pekerjaan kepada anak muda dalam tempoh 5 hingga 10 tahun seperti yang terkandung dalam Manifesto Kerajaan. Antara isu-isu yang akan dibincangkan oleh jawatankuasa ini meliputi pengangguran, tawaran gaji rendah, peluasan sektor pekerjaan dalam pelbagai bidang, kesepadanan pendidikan/latihan mengikut keperluan industri dan lain-lain.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

DARIPADA : DATO' SERI TIONG KING SING [BINTULU]

TARIKH : 7 NOVEMBER 2019 (KHAMIS)

SOALAN

DATO' SERI TIONG KING SING [BINTULU] minta **MENTERI INDUSTRI UTAMA** menyatakan :-

- (a) apakah rancangan jangka pendek dan jangka panjang pihak Kementerian dalam memperkuat penghasilan produk kelapa sawit di pasaran antarabangsa memandangkan keadaan peladang kecil terutamanya kawasan luar bandar tidak mempunyai peningkatan ; dan
- (b) apakah rancangan terbaru pihak Kementerian dalam meningkatkan hasil ekonomi negara melalui pengeksportan hasil industri utama seperti kelapa sawit dan getah.

JAWAPAN

Tuan Yang di-Pertua,

Antara rancangan terbaharu pihak Kementerian dalam meningkatkan hasil ekonomi negara melalui pengeksportan hasil industri sawit adalah seperti berikut:

- i. menggalakkan aktiviti penyelidikan dan pembangunan (R&D) bagi menjamin kelestarian produk sawit di samping meningkatkan nilai tambah produk berasaskan sawit;
- ii. meningkatkan permintaan dengan memperkukuh pasaran sedia ada dan meneroka pasaran baharu melalui aktiviti promosi dan pengembangan pasaran di dalam dan luar negara;
- iii. meningkatkan akses pasaran dan seterusnya meningkatkan penggunaan minyak sawit di kalangan pengguna di negara-negara pengimport melalui rundingan perjanjian perdagangan bebas (FTA) dua hala dan perundingan pelbagai hala atau serantau;
- iv. menjadikan Skim Pensijilan Minyak Sawit Mampan Malaysia (MSPO) mandatori pada Januari 2020 sebagai satu langkah ke arah mewujudkan sistem kemampanan yang diterima secara global dan menjadikan minyak sawit milik Malaysia diterima sebagai pilihan utama pelanggan global; dan
- v. menjalinkan kerjasama dengan Indonesia menerusi penubuhan *Council of Palm Oil Producing Countries* (CPOPC) bagi membolehkan perancangan dan pelaksanaan aktiviti-aktiviti untuk memperkukuhkan harga dilaksanakan.

Tuan Yang di-Pertua,

Bagi komoditi getah, Kementerian melalui Majlis Promosi Eksport Getah Malaysia (MREPC) giat menjalankan pelbagai aktiviti promosi pemasaran bagi memastikan industri hiliran getah Malaysia terus berkembang maju dan menyumbang kepada eksport negara. Antara rancangan terbaharu yang mampu meningkatkan eksport produk getah Malaysia adalah menerusi aktiviti-aktiviti berikut:

SOALAN NO : 32

- (a) mempromosikan produk getah bernilai tinggi seperti produk getah untuk industri pembinaan dan kejuruteraan, bunga tayar pra-awet (*precured treads*) dan tilam lateks. Aktiviti promosi pemasaran produk-produk ini akan ditumpukan ke negara-negara maju dan membangun seperti Amerika Syarikat, Jepun, Brazil, Afrika Selatan, Filipina dan Indonesia pada tahun hadapan;
- (b) meneruskan promosi produk getah bagi kategori barang guna habis untuk perubatan (*medical consumables*) seperti sarung tangan getah yang mempunyai potensi pasaran yang baik di negara-negara yang mempunyai populasi penduduk yang tinggi serta menunjukkan peningkatan peruntukan bagi penambahbaikan sektor kesihatan. Selain dari negara-negara maju seperti Amerika Syarikat dan Jerman, tumpuan promosi pemasaran kini dipergiatkan di negara-negara membangun seperti China dan India; dan
- (c) menjalankan promosi khusus seperti seminar pendidikan tentang produk getah serta menyertai pameran domestik dan lawatan pasaran yang bertujuan untuk mengenal pasti peluang-peluang baharu bagi produk getah Malaysia.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN KHAIRY JAMALUDDIN [REMBAU]

TARIKH : 7 NOVEMBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan apakah persediaan Kerajaan dalam bentuk infrastruktur fizikal dan bukan fizikal untuk menghadapi cabaran pada masa hadapan susulan keputusan Kerajaan Indonesia untuk memindahkan ibu negara mereka ke daerah Kalimantan Timur dan bagaimanakah Kerajaan akan memastikan Malaysia turut mendapat pulangan positif daripada keputusan Kerajaan Indonesia ini.

JAWAPAN

Tuan Yang Dipertua

1. Indonesia merupakan rakan dagangan ke-9 terbesar Malaysia dengan jumlah perdagangan sebanyak RM72.4 bilion (eksport: RM31.9 bilion; import: RM40.5 bilion) iaitu 3.8% daripada jumlah perdagangan negara pada tahun 2018. Cadangan pemindahan pusat pentadbiran Indonesia dari Jakarta ke Kalimantan dijangka menyediakan peluang ekonomi yang boleh dimanfaatkan oleh Sabah dan Sarawak dari segi peningkatan aktiviti ekonomi serta hubungan dagangan dan pelaburan. Selain itu, perusahaan kecil dan sederhana (PKS) dijangka memperoleh akses pasaran baharu, mewujudkan peluang pekerjaan dan menarik lebih ramai pelancong.

2. Pada tahun 2018, negeri Sabah telah mencatat pertumbuhan ekonomi sebanyak 1.5%, manakala negeri Sarawak pula telah berkembang sebanyak 2.0%. Pertumbuhan yang dicatatkan oleh kedua-dua negeri ini adalah lebih perlahan berbanding negeri-negeri lain. Cadangan pemindahan pusat pentadbiran Indonesia dari Jakarta ke Kalimantan dapat memacu pertumbuhan ekonomi Sabah dan Sarawak yang bersempadan dengan Kalimantan. Seiring dengan Wawasan Kemakmuran Bersama 2030, penekanan yang lebih besar akan diberi untuk memastikan pembangunan wilayah yang seimbang dengan mempelbagaikan lagi asas ekonomi dan membangunkan aktiviti ekonomi.

3. Di bawah platform Kawasan Pertumbuhan ASEAN Timur Brunei Darussalam-Indonesia-Malaysia-Filipina (BIMP-EAGA), pelbagai perkara dibincangkan khususnya untuk meningkatkan kesalinghubungan (*connectivity*) antara wilayah dan juga mengurangkan jurang kemiskinan antara penduduk wilayah BIMP-EAGA. Dokumen *BIMP-EAGA Vision 2025* (BEV2025) telah menetapkan halatuju strategik pembangunan kerjasama serantau ini serta menetapkan sasaran untuk menjadi sebuah wilayah yang berdaya saing dan mampan. Di bawah BEV2025, sebanyak 69 Projek Infrastruktur Utama (PIP) telah disenaraikan dengan anggaran kos sebanyak AS\$22.7 bilion untuk dilaksanakan di keempat-empat negara anggota BIMP-EAGA. PIP ini merangkumi projek seperti pembinaan jalan raya, landasan keretapi, pembangunan lapangan terbang dan pelabuhan.

4. Antara usaha yang dilaksanakan melalui platform BIMP-EAGA termasuk penaiktarafan pos sempadan Tebedu, Sarawak dan Entikong, Kalimantan Barat kepada pintu masuk Antarabangsa dan peluasan Pelabuhan Kontena Teluk Sapangar di Sabah untuk merancakkan industri logistik di wilayah ini. Usaha juga diambil bagi menambah baik kesalinghubungan antara wilayah melalui pembinaan Lebuh raya Pan Borneo serta pembinaan jalan menghubungkan Kalabakan dan Serudong di Sabah sepanjang 40 km yang diluluskan peruntukan sebanyak RM600 juta melalui Belanjawan 2020.

5. Terdapat beberapa projek infrastruktur yang dijangka boleh dimanfaatkan oleh negara untuk meningkatkan hubungan dagang di antara Malaysia dan Indonesia. Projek infrastruktur yang sedang dilaksanakan oleh Pihak Berkuasa Pembangunan Ekonomi dan Pelaburan Sabah (SEDIA) dan Lembaga Pembangunan Koridor Wilayah (RECODA) seperti Pembesaran Pelabuhan Kontena Sapangar Bay, Kelompok Industri Berasaskan Kelapa Sawit di Lahad Datu dan Sandakan, Taman Perindustrian Samalaju, Pusat Hab Halal Tanjung Manis, dan projek *Baram – Integrated Highland Agriculture Station* dijangka akan memberi lebih banyak peluang perdagangan di antara rakyat Sabah dan Sarawak dengan rakyat Kalimantan, Indonesia.

6. Selain itu, pembangunan kawasan Tunoh oleh RECODA sebagai sebuah bandar baharu yang berpotensi untuk dimanfaatkan dengan pemindahan ibu kota Indonesia ke Kalimantan. Dalam hal ini, di bawah Rancangan Malaysia Kesebelas (RMKe-11), Kerajaan Persekutuan telah memperuntukkan RM5 juta untuk pelaksanaan Kajian Pusat Bandar Baharu Tunoh.

7. Dari aspek perancangan pembangunan, di bawah Rolling Plan 4 (2020) RMKe-11, negeri Sabah telah pun diperuntukkan sejumlah RM5 billion bagi melaksanakan sebanyak 148 projek baharu dan 616 projek sambungan melalui pelbagai kementerian. Manakala bagi negeri Sarawak, Kerajaan telah memperuntukkan sejumlah RM4.5 billion bagi melaksanakan sebanyak 37 projek baharu dan 584 projek sambungan melalui pelbagai kementerian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN TAN KOK WAI [CHERAS]

TARIKH : 7 NOVEMBER 2019 (KHAMIS)

SOALAN

Minta **PERDANA MENTERI** menyatakan senarai terperinci Rang Undang-undang yang tidak diperkenankan oleh DYMM Seri Paduka Baginda Yang di-Pertuan Agong serta tidak diluluskan oleh Dewan Negara dan Dewan Rakyat sejak 1959 hingga kini.

JAWAPAN: YB TUAN MOHAMED BIN HANIPA, TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, berdasarkan rekod, Rang Undang-undang Perlembagaan (Pindaan) 1993 (DR.1/1993) yang diluluskan oleh Dewan Rakyat dan Dewan Negara pada 19 Januari 1993 dan 20 Januari 1993 telah tidak diperkenan oleh KDYMM Seri Paduka Baginda Yang di-Pertuan Agong. Susulan daripada itu, satu Mesyuarat Khas telah diadakan pada 8 hingga 10 Mac 1993 yang disusuli dengan perkenan oleh KDYMM Seri Paduka Baginda Yang di-Pertuan Agong pada 22 Mac 1993.

Selain itu, Rang Undang-undang Majlis Keselamatan Negara 2015 (DR. 38/2015) yang diluluskan oleh Dewan Rakyat pada 3 Disember 2015 dan Dewan Negara pada 22 Disember 2015 telah tidak diperkenan oleh KDYMM Seri Paduka Baginda Yang di-Pertuan Agong. Walau bagaimanapun, Rang Undang-undang tersebut telah menjadi undang-

undang berdasarkan Perkara 66(4A) Perlembagaan Persekutuan iaitu *“jika sesuatu Rang Undang-Undang tidak diperkenan oleh Yang di-Pertuan Agong dalam masa yang ditentukan dalam fasal (4), Rang Undang-Undang itu hendaklah menjadi undang-undang apabila habis masa yang ditentukan dalam Fasal itu mengikut cara yang sama seolah-olah dia telah memperkenankannya.”*

Seterusnya, Rang Undang-undang Antiberita Tidak Benar (Pemansuhan) 2018 (DR.14/2018) telah diluluskan oleh Dewan Rakyat pada 16 Ogos 2018. Walau bagaimanapun, Rang Undang-undang tersebut telah tidak diluluskan oleh Dewan Negara pada 12 September 2018.

Akhir sekali, Rang Undang-undang Perlembagaan (Pindaan) 2019 (DR.7/2019) telah tidak diluluskan oleh Dewan Rakyat pada 9 April 2019 apabila tidak mendapat dua per tiga majoriti yang diperlukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAHIDI BIN ZAINUL ABIDIN
[PADANG BESAR]**

TARIKH : 7 NOVEMBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan apakah usaha Kementerian dalam memastikan negeri Perlis keluar dari negeri yang miskin sepertimana yang diumumkan YAB Perdana Menteri pada 14 September 2019 dan adakah pembangunan infrastruktur dan kemudahan di negeri Perlis akan diberikan keutamaan oleh Kerajaan.

JAWAPAN

Tuan Yang di-Pertua,

Kementerian Hal Ehwal Ekonomi (MEA) melalui Kajian Separuh Penggal Rancangan Malaysia Kesebelas (KSP RMKe-11) di bawah Tonggak ke-3 iaitu Menuju ke arah Pembangunan Wilayah yang Seimbang telah memberikan penekanan untuk mempercepat pertumbuhan ekonomi dan menangani ketidakseimbangan antara dan dalam wilayah melalui beberapa strategi dan inisiatif antaranya memastikan pengagihan peruntukan pembangunan yang lebih baik kepada negeri kurang membangun dengan keutamaan diberi kepada enam negeri termasuk Perlis. Ini bagi membolehkan pengagihan manfaat sosioekonomi yang lebih baik untuk memastikan pertumbuhan saksama demi meningkatkan kesejahteraan rakyat.

Untuk makluman Ahli Yang Berhormat, Kerajaan Persekutuan telah meluluskan Peruntukan Pembangunan di Perlis melalui *Rolling Plan* 4 pada tahun 2019 meningkat kepada RM319 juta berbanding RM247 juta pada tahun 2018. Peningkatan peruntukan ini menunjukkan komitmen Kerajaan Persekutuan dalam mempercepatkan pembangunan serta meningkatkan ekonomi di Perlis di samping memastikan pertumbuhan yang lebih seimbang dengan negeri-negeri lain. Melalui peruntukan pembangunan ini, ia bakal membantu menarik lebih banyak pelaburan berkualiti serta merangsang pertumbuhan dan meningkatkan daya saing ekonomi di Perlis.

MEA juga turut memberi penekanan kepada pelaksanaan projek-projek fizikal berimpak tinggi dalam usaha merapatkan jurang pembangunan antara wilayah. Antara projek berimpak tinggi di Perlis yang telah diluluskan dalam RMKe-11 seperti *Perlis Inland Port (PIP)* dan Kawasan Industri Lembah Chuping (CVIA) yang akan memberikan *outcome* limpahan ekonomi dengan mewujudkan sebanyak 12,674 peluang pekerjaan, manakala projek PIP sebanyak 4,056 peluang pekerjaan. Dalam hal ini, Kerajaan amat yakin sekiranya projek fizikal berimpak tinggi ini siap kelak, sudah pasti rakyat Perlis akan mendapat manfaat melalui pewujudan peluang pekerjaan dan aktiviti ekonomi yang bakal terhasil seiring dengan pembangunan tersebut. Kerajaan juga komited untuk memastikan projek CVIA dan PIP dijayakan sebaiknya bagi merealisasikan hasrat Kerajaan meningkatkan taraf hidup rakyat di Perlis dan seterusnya merapatkan jurang pembangunan antara negeri dan wilayah.

Tuan Yang di-Pertua,

Dalam usaha Kerajaan meningkatkan pembangunan Perlis, sektor pelancongan turut tidak dilupakan. Di dalam hal ini, Pelan Induk Perancangan Fizikal Pelancongan Negeri Perlis sedang dalam pelaksanaan. Selain itu, bagi meningkatkan kemudahan infrastruktur di Perlis ke arah menggalakkan lebih ramai pelancong masuk ke negeri ini, Kerajaan komited dalam meneruskan pelaksanaan projek menaiktaraf Kompleks Imigresen, Kastam dan Kuarantin (ICQ) Padang Besar, Perlis, kerja-kerja pengerukan untuk keselamatan alur pelayaran bagi laluan

bot dan feri di Basin Kuala Perlis, menaiktaraf taman awam Perlis dan projek pembinaan Terminal Pengangkutan Awam Bersepadu Perlis (Kangar Sentral). Kesemua projek dengan kos berjumlah hampir RM65 juta ini dilihat dapat membantu meningkatkan sektor pelancongan melalui peningkatan kemudahan dan pergerakan pelancong dalam dan luar ke Perlis. Kemudahan pengangkutan awam seperti ETS terus ke Padang Besar sejak tahun 2015 juga telah memanfaatkan sektor pelancongan bagi menambah lagi sumber ekonomi kepada Perlis.

Selain itu, inisiatif penyediaan infrastruktur yang lebih baik dan peningkatan ketersambungan luar bandar ke bandar, sebanyak RM126.2 juta telah diperuntukkan bagi pembinaan jalan perhubungan desa serta bagi membina jalan dari Kg Chuping Bawah Bukit ke Kg. Guar Musang dan Panggas Besar, membina jalan dari Sg. Adam ke Kg. Banat dan membina Jalan Padang Nyu Rani Estate ke Jalan Padang Siding.

MEA terus memberikan keutamaan kepada pembangunan infrastruktur dan kemudahan Perlis. Satu sesi libat urus Rancangan Malaysia Kedua belas (RMKe12) pada 6 Ogos 2019 telah mengenalpasti input daripada Kerajaan negeri Perlis bagaimana Kerajaan Persekutuan dapat membantu membangunkan Perlis dalam pelan pembangunan yang akan datang. Wawasan Kemakmuran Bersama (WKB) 2030 yang dilancarkan pada 5 Oktober 2019 merupakan satu platform untuk merapatkan jurang pembangunan antara wilayah. Prinsip Kemakmuran Bersama didukung sepenuhnya oleh MEA dalam menggubal pelan pembangunan RMKe12 demi menjana pertumbuhan ekonomi yang mampan dan pengagihan kekayaan negara yang saksama termasuk Perlis.

Sehubungan itu, adalah amat diharapkan kerajaan negeri terus menyokong usaha Kerajaan untuk bersama-sama menggembeleng tenaga dalam menjayakan agenda pembangunan negara, khususnya di Perlis melalui pelaksanaan kesemua projek pembangunan yang telah diluluskan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 7 NOVEMBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan status pembayaran royalti minyak kepada Kerajaan Negeri Kelantan khususnya selepas saman terhadap Petronas oleh Kerajaan Negeri Kelantan ditarik balik sepenuhnya sebagaimana tuntutan Kerajaan Pusat.

JAWAPAN

Tuan Yang di-Pertua,

1. Sebagaimana Ahli Yang Berhormat sedia maklum, Kerajaan Negeri Kelantan secara rasminya telah menarik balik kes tuntutan pembayaran tunai petroleum di Mahkamah Tinggi Kuala Lumpur ke atas Petroliam Nasional Berhad (PETRONAS) sebagai Defendan Pertama (1) pada 21 Mei 2019 dan Kerajaan Persekutuan Malaysia sebagai Defenden Kedua (2) pada 27 Jun 2019 lalu.
2. Susulan penarikan balik saman oleh Kerajaan Kelantan kepada Kerajaan Persekutuan, Kementerian Hal Ehwal Ekonomi (MEA) menerima satu Notis Pemberhentian Kes secara rasmi daripada pihak Jabatan Peguam Negara (AGC) melalui Penasihat Undang-undang MEA pada 5 Jun 2019.
3. Berdasarkan makluman rasmi penarikan tersebut, Kerajaan Persekutuan telah mengambil langkah susulan supaya perkara berkaitan pembayaran tunai Kerajaan Negeri Kelantan dapat diselesaikan dengan segera.
4. Hasil semakan Kementerian ini dengan PETRONAS mendapati bahawa pembayaran tunai bagi Ogos 2019 sejumlah RM16.79 juta telahpun dilunaskan oleh PETRONAS kepada Kementerian Kewangan untuk maksud ini. Pihak Kementerian Kewangan menyalurkan sebanyak 50 peratus daripada bayaran tunai kepada Kerajaan Negeri Kelantan manakala 50 peratus lagi disalurkan kepada Majlis Agama Islam dan Adat Istiadat Melayu Kelantan (MAIK).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : PUAN RUSNAH BINTI ALUAI [TANGGA BATU]

TARIKH : 7 NOVEMBER 2019 (KHAMIS)

SOALAN NO. 37

Minta **MENTERI AIR, TANAH DAN SUMBER ASLI** menyatakan adakah langkah-langkah yang diambil bagi mengurangkan hakisan pantai dan kesan negatif projek penambakan laut di sepanjang pantai dalam Parlimen Tangga Batu, Melaka selama ini berkesan dan dapat menyelesaikan masalah.

JAWAPAN

Tuan Yang di-Pertua,

1. Kelulusan projek penambakan laut adalah di bawah bidang kuasa dan kawalan pihak Kerajaan Negeri atau Pihak Berkuasa Tempatan.
2. Projek penambakan laut adalah merupakan aktiviti yang tertakluk di bawah Perintah Kualiti Alam Sekeliling (Aktiviti Yang Ditetapkan) (Penilaian Kesan Kepada Alam Sekeliling) 2015 Akta Kualiti Alam Sekeliling 1974 dan memerlukan kajian kesan kepada alam sekeliling (EIA) dilaksanakan oleh pemaju. Melalui kajian EIA, pemaju hendaklah mengenalpasti, meramal serta menilai impak pelaksanaan cadangan pembangunan berkenaan terhadap alam sekitar termasuklah kemungkinan berlakunya hakisan pantai serta mencadangkan langkah-langkah mitigasi yang perlu diambil bagi mencegah, mengurangkan atau mengawal kesan kepada alam sekeliling.
3. Laporan tersebut perlu dikemukakan kepada Ketua Pengarah Alam Sekitar untuk kelulusan sebelum apa-apa aktiviti dijalankan oleh pihak pemaju projek samada oleh pihak kerajaan atau swasta. Pemaju hendaklah memberi bukti yang cukup bahawa syarat kelulusan dipatuhi dan langkah-langkah kawalan diambil untuk mencegah, mengurangkan atau mengawal kesan kepada alam sekeliling.
4. Kementerian Air, Tanah Dan Sumber Asli (KATS) melalui Jabatan Pengairan dan Saliran (JPS) telah melaksanakan langkah jangka

pendek untuk mengurangkan kejadian hakisan di kawasan tersebut. Hasil daripada projek-projek yang telah dilaksanakan, kawasan balai nelayan dan kepentingan nelayan dapat dilindungi. Masalah mendapan pasir di saluran keluar juga dapat diatasi bagi mengurangkan masalah banjir di bahagian hulu dan secara tidak langsung mengurangkan kejadian hakisan.

Sekian, terima kasih